

KU HAGANEKA

A hi yimiseni xisweswo sweswi loko ha ha korhamisa tinhloko ta hina. Hosi Yesu, ntsena ho va eku pfumeleni. U hi byerile ntsena ku va hi pfumela, naswona ha pfumela sweswi. Kutani hi Ku nyika ku khensa na ku dzuneka eka leswi ku nga khale hi swi twile na ku swi vona, leswi swi tiyisaka ripfumelo ra hina. Hilaha hi Ku khensaka hakona hikokwalaho ka nkateko wun'wana wa ku ta hi ta ministarela lava va nga na swilaveko. Sweswi ndza Ku khongela, Xikwembu, ku fikelela swilaveko swa hina hi ku ya hi xitshembhiso xa Wena. Hi Vito ra Yesu ha swi kombela. Amen.

2 Hi tsakile swinene vusiku lebyi hikokwalaho ka nkateko wa ku vuyela endzhaku etabernakeleni nakambe, ku—ku... hi Evhangeli ya Hosi Yesu loyi a nga pfuka. Nakona a ndzi hlwerilyana. Ndzi vile na mhangu ya xihatla ku suka eMichigan sweswinyana. Nakona Hosi yi n'wi endlerile nchumu wo hlamarisa ngopfu. Mina, hilaha Yi tivaka swilo hinkwaswo na ku swi andlala ntsena... A wu faneli ku Yi byela; Ya swi tiva, Yi tiva ntsena leswi swi nga swona. Swingaleswi hi khensa swinene. Vanhu va chayerile siku hinkwaro ku ta fika lahawani. Nakona, kutani, hi khensa swinene eka sweswo. Sweswi, mi nga rivali e...

Thepi leyi yi pfuleriwile? [Makwerhu Neville a ku, “Hi yaleyo swichi ya rivoni kwalano.”—Muhleri.] Oho, swichi ya rivoni. Ndza yi vona.

Mi nga rivali e—e swikhongelo eka vhiki leri taka, vusiku bya Ravunharhu, na mixo wa Sonto lowu landzelaka, na vusiku bya Sonto. Loko mi ri kona, kwala kusuhi, ndza swi tiva leswaku va ta swi tsakela ku va na n'wina lahawani.

Nakona sweswi, ndzi khongeeleni, tanahi laha ndzi tekaka ndlela ya mina ku ya kun'wana, naswona ndzi tshembha leswaku ndzi ta vuya ku nga ri khale.

3 Ndzi lava ku mi khensa hinkwenu hikokwalaho ka malwandla ya n'wina na mikhumbulo ya leswi mi nga ndzi endlela swona. Nakona boti un'wana wa ha ku ndzi rhumela suti yintshwa ya swiambalo ku suka le hansi ekerekeni leyintsongo eGeorgia. Kutani—kutani vanhu valavo... Ntsena swa hlamarisa swinene. Nakona ndzi lava ku khensa vanhu lavaya va humaka le Kentucky, lava a ndzi ri na vona vhiki leri nga hundza eku vhakacheni. Na hinkwaswo leswi Hosi yi nga hi endlela swona lahaya, lerikulu, voko ra matimba leri hi nga ri vona eka Yona, leswi Yi nga swi endla.

4 Sweswi hi tshembha leswaku hi ta mi vona nakambe ku nga ri khale, ntsena loko ndzi ta va ndzi vuyile hi ndlela leyi, ku ya

eNew York hikokwalaho ka nhlengeletano. Kwalaho hi le Stone Church na Makwerhu Vick, ku sungula, ndzi pfumela leswaku i Hukuri hi ra vukhume mbirhi. Nakona hi ta va hi ri kwala, eka masiku nyana loko nkarhi wu nga se fika.

Kutani hi ta tlhela hi hundza nakambe, ku ya e—e hansi le Shreveport, Louisiana, na Makwerhu Jack Moore. Sweswo swi hi ku nyikela ko Khensa, vhiki ra ku nyikela ko Khensa, ku va lahaya eShreveport. Swi le ka bodo ya tinhlokohaka ta mahungu, ndza ehleketa, le ndzhaku eka switiviso.

⁵ Naswona hi langutela ku va hi ri na van'wana va vanghana va le Dzongeni endzhaku ka Khisimusi. Nakona hi ta va hi ri ePhoenix hi Sunguti. Kutani hi ta va hi rindzerile riqingho ra le ntsungeni wa malwandle, leswaku hi ta kota ku lulamisela tinhle ngeletano ta le ntsungeni wa malwandle. Va le ku tirhaneni na tona sweswi, n'hweti leyi nga hundza, Makwerhu Borders, u ya endzhaku na le mahlweni, hikokwalaho ka rendzo leri heleleke ra misava leri ri nga ta sungula ntsena loko hi ta kota ku ri lunghekisa, kambe hi fanele ku yimela swiyimo.

⁶ Mintshungu i yikulukumba swinene lahaya, hi nga ka hi nga va veki emiakwini; ntsena ho fanelo ku va tshamisa ehansi le handle. Kutani minkarhi yin'wana ya pfelela, hakanyingi a swi khorwisi eka tinhlayo, minkarhi yin'wana ku tala ku fika eka ntlanu wa madzana ya magidi. Valava i hafu ya miliyoni wa vanhu eka nhlengeletano yin'we; ku nga ri leswaku i va ngani lava va hlengaletanaka eka masiku yo karhi, kambe hi nhlengeletano yin'we. Ma swi tiva, hi ntoloveloo vaevhangeli va hlayela leswaku i vanhu va ngani lava va nga ta hi ntsevu wa mavhiki. Ma swi vona? Kambe hi—hi hlayela ntsena leswaku i va ngani lava va nga lahaya hi siku rero, hi nkarhi wolowo. Nakona minkarhi yin'wana ku va ku ri hava ndhawu yo va tshamisa kona, ma swi tiva, ntsena ku va veka ehansi le handle.

Kutani hi fanele ku kuma tinguva leti ku vaka ku nga ri na mpfula na mpfula leyi nga eku nen. Nakona vambuyangwani lavaya va tshame le handle... Ndzi vonile vavasati va tshamile le handle na misisi ya vona yi ri karhi yi lenga-lengela ehansi, vanhu lava ambeleke kahle, nakona ntsena—ntsena va tshama kwalahaya mpfuleni liya siku hinkwaro. Ntsena ku tshama kwalahaya, nakona yi ri karhi yi halakela ehansi, na tilo ri ri karhi ri pfuma, na ku hatima, na swidzedze swi ri karhi swi hunga, kutani vona va ri karhi va ya endzhaku na le mahlweni ku hlangana na un'wana kukotisa sweswo, va tshamile kwalahaya, va yimerile ku va u ta ku ta va khongeleta. Wa vona? Sweswi, ma swi tiva leswaku Xikwembu xi xixima ripfumelo ro kotisa rero. Xa swi endla.

⁷ Mi fanele ku endlela Xikwembu swin'wana ku va xi mi xixima. Ma swi vona? Ma Xi kombisa. Vanhu lava va kumaka swilo hinkwaswo hi ku olova, hi ntoloveloo a va... A va—a va endli nchumu hikokwalaho ka swona, ma swi vona. Mi fanele ku

swi endla . . . Nyiko i ya mahala, wolowo i ntiyiso, kambe mi—mi fanele ku swi endla . . .

⁸ Swi tikomba tano, ma swi tiva, tanahi laha va nge, “Loko u tswariwile na lepula ra silivhere,” mi swi twile sweswo, “a wu khensi.” Kambe loko mi fanele ku swi tirhela, mi khensa vuringanyeti bya nkoka wa swona.

⁹ Sweswi n’wina vanhu lava nga eka tithepi kwalano, a ndzi ta lava leswaku—leswaku . . . Ndzi ehleketa leswaku sweswi ndzi . . .

Mixo lowu, hungu ra mixo lowu a ri ri, eka mina, swiendlakalonkulu swa Hungu ra ministri wa mina hinkwawo; mixo lowu, wa vona, xiendlakalonkulu xa Hungu ra ministri wa mina hinkwawo. Siku rin’wana ndzi ta mi byela hilaha swi tiseke xiswona. Nakona ndza swi tiva leswaku swilo hinkwaswo swi tirhekile eka tin’hweti na tin’hweti na tin’hweti, ku ya fika eka Hungu leriya rin’we, ku famba ku ya fika eka ndhawu yaleyo. Sweswo a ku ri nkarhi wa ku funengetiwa ka swona, ma swi vona. Nakona i . . .

¹⁰ Sweswi ndzi na xitiyisiso, kumbe ntshembho, leswaku mi swi kumile leswi Mfungho a wu vula swona. Wa vona? Mfungho i xikombiso xa leswaku Ngati yi totiwile. Leswaku, nxavo lowu wu komberiweke, lowu a wu laviwa hi Xikwembu, Yesu u hakerile nxavo wolowo hi ku halata Ngati ya Yena N’winyi. U swi endlile sweswo. Kutani, ku suka eka vutomi bya Yena ku tile Moya lowo Kwetsima. Kutani loko Ngati yi totiwile eka n’wina, Moya lowo Kwetsima i Mfungho wa leswaku nxavo wa n’wina wu hakeriwile; Xikwembu xi mi amukerile, nakona wolowo i Mfungho. Tsundzukani, wolowo i Mfungho. Sweswi, ku na vanhu vo tala lava va nga riki, a va—va swi tivi leswaku Mfungho wolowo i yini, wa vona. Kutani u fanele ku wu endla tanahi loko ku ri hava loyi a wu tivaka, wa vona, leswaku hinkwavo ka vona va ta wu kuma.

¹¹ Ntsena tanahi ku chumayela ku ponisiwa, hi fanele ku chumayela ku ponisiwa hi ndlela leyi munhu un’wana na un’wana, i ka un’wana na un’wana, leswi, hi swi tivaka leswaku a hi swona. Hi fanele ku chumayela ku horisa ka Vukwembu eka munhu un’wana na un’wana, hambileswi hi swi tivaka leswaku a hi swona. Wa vona? Yesu u tele ku ponisa lava a va ri eBukwini ya ku Kutsuriwa loko ku nga si va na masungulo ya misava. U tele ntsena ku ta ponisa valava. Leswaku i va mani, a ndzi swi tivi. Wa vona? Kambe n’wina . . . A ku na loyi a nga vaka na ripfumelo ehandle ka loko u vula leswaku i ra mani na mani; nakona swi tano, a ku na loyi a nga taka ehandle ka loko Xikwembu xi n’wi vitanile. Wolowo i ntiyiso. Swingaleswi ku na vanhu vo tala lava va nga taka va nga ponisiwi. Ha swi tiva mayelana na swona. Vona, kunene, Xikwembu xi tivile sweswo misava yi nga se sungula, leswaku a va nge ponisiwi.

¹² Kuna vo tala lava va nga taka va nga horisiwi, wa vona, vo tala a va nga horisiwi. Ntsena a va nge swi koti, a va nge swi koti ku swi khoma. A va swi tivi leswaku i yini. Vo tala va ta va tano. Kambe hi chumayela leswaku i ka un'wana na un'wana, hikuva a hi swi tivi leswaku munhu wa kona i mani; ntsena a hi swi tivi. Kambe yaloye i mani na mani, kambe vanhu van'wana a va nge swi koti ku khoma ripfumelo rero.

¹³ Sweswi, nakona i nchumu lowu fanaka hi Mfungho lowu. Mfungho, hi vulavurile hi Mfungho ndlela hinkwayo, kambe sweswi i ku vonakarisiwa ka Mfungho. Wa vona?

¹⁴ Sweswi, nkarhi wun'wana hi wu pfumelerile. Malutheran va wu pfumelerile eka ku, "Amukela Rito; ku amukela Kreste tanahi Muponisi." Mamethodist va te, "Loko u tsaka ku fikela laha u huwelelaka, sweswo hi Wona." Mapentekosta ma ri, "Vulavula hi tindzimi, kutani u na Wona." Nakona hi kuma leswaku hinkwaswo ka swona a swi hoxekile. Wa vona?

Mfungho i Mfungho. Hi wena na Kreste tanahi vanhu swin'we. Wa vona? I Moya lowo Kwetsima, Vutomi bya Yena byi le ka wena, ku tirhisa Vutomi bya Yena—Yena N'winyi ha wena. Nakona i wa van'wankumi, swisiwana, kumbe mani na mani loyi a nga ta Wu amukela. Sweswi tsundzukani, Mfungho hi lowu mi . . .

¹⁵ Mi ya eka khamphani ya switimela mi ya xava ntsengo wa n'wina. Ku na nxavo, ku durha. A hi swi tekeni swi durha ntlhanu wa macheleli ku khandziya bazi leri—leri, kumbe xitimela, ku suka laha kuya—kuya eCharlestown, Indiana, swi durha ntlhanu wa macheleli. Kunene, sweswi, khamphani yi humesa mimfungho leswaku . . . Wa vona? Sweswi, nchumu lowu u wu endlaka, u rhelela kwalahaya kutani un'wana a ku xavisela ntsengo wa wena, ntlhanu wa macheleli. Va ku nyika mfungho lowu wu ku nyikaka mfanelo eka xitimela xexo kukondza xi fika emakumu ka rendzo ra xona, kwihi na kwihi laha xitimela xexo xi yaka kona. Wa vona? Ya ku nyika . . . Wolowo i mfungho.

¹⁶ Sweswi, eka mhaka leyi, ngati a yi ri mfungho. Hi xidzi, a yi fanele ku totiwa, hikuva a ku ri khemisi ntsena leyi a va ri na yona, hikuva a ku ri ngati ya xinyimpfana, xiharhi, ngati ya xinyimpfana. Swingaleswi vutomi lebyi a byi ri engatini, vutomi lebyi a byi humile, swingaleswi ngati a yi halatiwile. Wa vona? Vutomi byi humile, kambe a byi nga ta tlhelela endzhaku eka mupfumeri, hikuva i bya xiharhi. Kambe a byi vulavula hi ripfalo lerinene, leswaku a ku ri na Loyi a taka, Gandzelo leri hetisekeke.

Kutani, ku yi endla Leyi hetisekeke, Muavanyisi hi ku angarhela, Xikwembu xa le Matilweni, xi hundzukile Gandzelo; Muavanyisi, Muahluri, na Gqweta. Wa vona? Xi hundzuka Gandzelo. Kutani loko Vutomi bya Xona byi humerile ehandle, laha a ku ri Xikwembu . . . Kutani rito lahaya, laha

ri taka, "Kutani Ndzi ta va nyika Vutomi lebyi nga Heriki." Sweswi, hi Xigiriki...Ndza swi tiva leswaku ndzi vulavula na swidyondzeki. Ndzi vona vambirhi kumbe vanharhu. Wa vona? Nakona ndzi...Nakona rito leri ri nga hi Xigiriki lahaya, i Zoe. Z-o-e, hi Xigiriki, leswi swi vulaka, "Vutomi bya Xikwembu hi Xoxe." "Kutani Ndzi ta n'wi nyika Zoe, Vutomi bya Mina N'winyi." Kreste na Xikwembu a va ri Un'we.

¹⁷ Kutani, Vutomi lebyi a byi ri eka Kreste i Moya lowo Kwetsima, ku nga ri Munhu wa vunharhu; kambe Munhu yaluya, hi xivumbeko xa Moya lowo Kwetsima, lowu wu taka ehenhla ka n'wina, tanihi Mfungho wa leswaku vutomi bya n'wina na ntsengo wa n'wina swi hakeleriwile, mi amukeriwile. Kukondza mfungho wolowo wu ta, a mi pfumeleriwanga egondzweninkulu, a mi pfumeleriwanga eka...eka—eka layini ya bazi; a mi pfumeleriwanga ku nghena endzeni kukondza mi kombisa mfungho lowu, naswona mfungho wolowo i ntsengo wa n'wina. Kutani sweswi Wu kombisa leswaku Ngati yi halatiwile nakona yi totiwile eka n'wina, nxavo wu totiwile eka n'wina, naswona mi na Mfungho wa leswaku Ngati yi totiwile eka n'wina nakona mi amukeriwile. Ma swi kuma sweswi? [Nhlenegetano yi ku, "Amen."—Muhleri.] Oho, mina! Oho!

¹⁸ Sweswi—sweswi, ntsena ku nga ri vumbhoni byo karhi. Ma vona? Mi ri, "Makwerhu Branham," ndza swi twa emiehleketweni ya wena, ma swi vona, "hikokwalaho ka yini ndzi ta swi tiva?"

Vonani, xana a mi ri yini, nakona xana mi yini? Hi sweswo leswi mi swi tivisaka xiswona. Wa vona? Xana a mi ri yini loko Mfungho lowu wu nga se totiwa? Xana mi yini endzhaku ka loko Wu totiwile? Xana a ku ri yini ku navela ka n'wina eku sunguleni, nakona xana i yini ku navela ka n'wina endzhaku? Kutani ma swi tiva loko ku ri leswaku Mfungho wu totiwile kumbe ee. Kutani swilo leswin'wana swi famba xikan'wekan'we hi swoxe na Sweswo. Ma vona?

¹⁹ A—a swi fani na ku vulavula hi swona, kutani mi ku, "Tindzimi i vumbhoni bya kona." Sweswi, ndzi ta rhwala, xava pherhe ya tintanghu, ririm i hi ntanghu. Ntsena ri ta na ntanghu, ma swi vona. Ntsena ri ta na ntanghu. Wa vona? Sweswi, i nchumu lowu fanaka hi Mfungho. Mfungho i Kreste. Kambe ku vulavula hi tindzimi, na ku hlongola madimona, na ku endla swilo leswiya, na ku chumayela, na hambi ku nga va yini, i vumbhoni bya leswaku Wu kona, i ntiyiso, kambe a hi—a hi Wona. Wa vona, i nyiko ya Wona. Loko a ndzi lo mi byela leswaku...

²⁰ U ri, "Ndzi—ndzi lava wena, Makwerhu Branham," kutani ndzi ku nyika nyiko, wa vona. Kunene, sweswo a hi mina, sweswo i nyiko ya mina.

Tindzimi i nyiko ya Moya lowo Kwetsima, ku nga ri Moya lowo Kwetsima; nyiko ya Moya lowo Kwetsima.

²¹ Nakona javulosi a nga encenyeta xin'wana na xin'wana xa swilo sweswo, kambe a nga ka a nga vi Moya lowo Kwetsima. Wa vona? A nga ha encenyeta tinyiko leti, kambe a nga ka a nga vi Moya lowo Kwetsima.

Nakona Moya lowo Kwetsima i Mfungho wa leswaku Ngati yi tirhisiwile, hikuva Wu landzelela Ngati eka ndlela hinkwayo ku suka eBukwini ya ku Kutsuriwa. Wa swi vona? Xexo a ku ri xikongomelo xa ku ta ka Yena. Sweswo hileswi Yena a swi landzela eka nguva yin'wana na yin'wana. Nguva yin'wana na yin'wana U landzerile sweswo, ku vona leswaku Wa humelerisiwa, nakona a va nga ta endliwa lava hetisekeke ehandle ka hina. Kutani sweswi Moya lowo Kwetsima wa khale wu endzela Kereke, ku endla Xikwembu enyameni ya ximunhu; tanihi laha Xi nga endla hakona emahlweni ka Sodoma, ku tshwa lahaya, loku a ku ri xifananiso. Kutani, Abraham, Xi humelerile eka yena.

²² Kutani hinkwaswo swilo leswi Xi nga swi endlangiki ku rhelela hi tinguva eka tinguva ta kereke, Xi le ku swi endleni sweswi. Ku tlhelela endzhaku eRitweni, hikuva mahungu na mahungu na mahungu ma fanele ku tsondzeleka eRitweni hinkwaro. Nakona hi masiku ya makumu, ku va Swilemo swa Nkombo swi lemuriwile, a ku ri ku rhwalela masalelwa hinkwawo lawa ya nga sala eka swona, na ku endla nchumu hinkwawo eka miri wun'we lowukulu wa Mutekiwa, leswaku lava a va hanya le ndzhaku a va nga ri na ku hetiseka kukondza Kereke leyi yi hetisekisiwa, ntlawa lowu wa Mutekiwa hi masiku ya makumu, ku va nghanisa endzeni, kutani hinkwawo va vutleriwa ehenhla. Wa vona?

²³ Mfungho, Yesu Kreste, Moya lowo Kwetsima, wu le xikarhi ka hina. Hi fanele ku swi xixima sweswo. Hi—hi—hi—hi nga ka hi nga titsongahati ku ringanelia. Ku hluvula tintanghu ta n'wina, kumbe ku khinsama hi matsolo ya n'wina, swi nga ka swi nga swi hlongoli; a swi nga ta—a swi nga ta swi enerisa, a swi nga ta hi enerisa; kambe vutomi lebyi humesaka muhandzu wa Moya!

²⁴ Sweswi xana i yini muhandzu wa Moya? Wa vona? Rirhandzu, ntsako, ku rhula.

²⁵ Ma tsundzuka mixo lowu? Ku lulamisela, xi rhumerile murhumiya na Hungu. Nchumu wo landzela lowu Xi nga wu endla, endzhaku ka loko Xi rhumerile murhumiya na Hungu, Xi rhumerile Langavi ra Ndziilo tanihi xitiyisiso. Nchumu lowu nga landzela a kuri, endzhaku ka sweswo, a ku ri ntlawa wa tanye... kumbe ku chavelela. Wa vona? A mi swi tiva leswaku a mi lulamile, a mi ri na ku rhula. Hi na ku rhula na Xikwembu, hi Hosi Yesu Kreste. Wa vona?

²⁶ Sweswi vusiku lebyi hi ya eku khongeleteni ka vavabyi, nakona ndzi ehleketa leswaku va na xilalelo. Mi—mi ta va na nkhuvulo, ntirho wa ku khuvula? [Makwerhu Neville a ku, “Ee.”—Muhleri.] Xilalelo ntsena, xilalelo. Kutani hi lava leswaku mi tshamela xilalelo.

²⁷ Kutani hi kwalomu—kwalomu ka makume nharhu-ntlhanu kumbe makumemune wa timinetse hi kunguhata ku va hi hetile na ku lunghekela xilalelo. Kutani sweswi, mundzuku i nkarhi wa Siku ra Vatirhi, swingaleswi mi nga ha tiwisela. Sweswi, ndzi vurile leswaku yalawa a ku ri makungu ya hina, ma swi vona. A hi swi tivi leswaku ku ta va nkarhi muni. Ndzi lava ku tiyisisa ku endla leswaku sweswo swa lulama.

²⁸ Sweswi, mixo lowu ndzi mi byerile, ku va ndzi nga ri na n’wina, ndzi—ndzi ehleketa leswaku hi vile na Hungu ra tiawara timbirhi kumbe tinharhu emixweni lowu. Kambe—kambe ndza—ndza ha ku sungula, nakona a ndzi ehleketa leswaku ndzi to rhwala sweswo eka vusiku lebyi, kambe a swi ri leswi hlamarisaka swinene. A ndzi swi tivi hambi vanhu va swi kumile kumbe ee. Ndzi tshembha leswaku va swi kuma, hinkwakonkwako. Naswona ndzi tshembha leswaku a ku ri na tithepi tin’wana ta kahle eka swona, leswaku swi ta yisiwa ehandle, ku ya tiviwa, leswaku ndza pfumela, leswaku hi Mahungu hinkwawo lawa ndzi nga tshama ndzi ma tisa, leswaku ku hetiseka ku vekiwile ximfumo hi Xikwembu, ehandle ka... Kunene, xileriso xa ntolovel, tanihi Swilemo swa Nkombo na swilo, leswi hi ku kongoma a swi ri Rito ra Xikwembu. Ndzi vulavula hi Hungu ro ri chumayela; ndzi pfumela leswaku leriya a ku ri rona, wa vona, leriya—leriya, leri ri lavekaka ku va ri landzela Swilemo leswiya swa Nkombo.

²⁹ Sweswi vonani leswi swi nga ta endzhaku ka Swilemo swa Nkombo: ku hlangana ka vanhu, swikombiso swa ku hlangana, ku hatima ka rivoni ro tshwuka hi masiku yo hetelela, xikombiso xa ku va vavasati va nyanya ku saseka, na vavanuna, leswi va nga ta swi endla. Hinkwaswo swikombiso leswi swa Moya lowo Kwetsima swi ri karhi swi rhangela, kutani swi tlhela swi vuyela endzhaku lahwani eka ku fununguriwa ka Hungu hi mpfhuka ka Swilemo swa Nkombo. Swi fununguriwa eka nchumu lowu wun’we, Mfungho, leswaku hinkwerhu hi lulamile, wa vona, ntsena ku va hi tikambela hina vinyi na ku vona leswaku hi le Ripfumelweni.

³⁰ Sweswi, Hosi yi mi katekisa. Kutani sweswi loko hi—loko hi nga se pfula eBibeleni, ku khongeleta vavabyi... Hi vutisile emixweni lowu, leswaku i va ngani lava va nga khongeleriwa eka vusiku bya Sonto lowu nga hundza, lava—lava—lava va nga horisiwa, lava ku nga khale va horisiwile eka vhiki leri, nakona munhu un’wana na un’wana u yimisile voko ra yena, loyi a ri enhlengletonweni eka vusiku bya Sonto lowu nga hundza. Sweswi, i nchumu wun’wana, lowu mi wu twisisaka.

I nchumu wun'wana lowu... I, ndzi le ku tikumeleni ka leswi mina n'winyi.

³¹ A ku ri na xifanyetana, lexi a xa ha ku byeriwa, a xi huma eChicago, Manana lontsongo... Xana wansati luya i, Peckinpaugh, Peck-... Manana Peckinpaugh ku suka—ku suka... I sesi wa Mukreste wa kahle swinene. Nakona u tisile munhu un'wana, e—e xihlangi, hi ndlela leyi ndzi swi twisisaka hakona, xifanyetana kumbe swin'wana, laha—laha... madokodela a ma nga swi tivi leswaku hi swihi leswi nga hoxeka hi xona. Mahawu ma xona a ma nga ri kahle, kumbe swin'wana, lero—lero a va nga ta endla... a va nga ta xi yisa exikolweni kumbe swin'wana. A xi nyanyile, ku nyanya ku tlula mpimo. Kutani u te, Moya lowo Kwetsima endzhaku ka Hungu, wu vulavurile na xifanyetana lexiya, na ku xi vitana, wu xi byela xiyimo xa xona na swin'wana, na ku tivisa ku horisiwa ka xona.

Kutani vhiki leri xi yile, manana kumbe vatsvari, kumbe hambi a ku ri mani, u xi tlheriserile eka dokodela, kutani dokodela u vule leswaku a xi ri na sete yintshwa ya mahawu, wa vona, sete yintshwa ya mahawu. Nakona hi ndlela leyi ndzi twisisaka hakona, leswaku—leswaku vatsvari kumbe munhu un'wana u bile rinqingho ra mpfhuka wo leha, kumbe ndlela yin'wana, ku endla leswaku swi tiveka eka nhlengeletano. Wa vona? Sweswi, Xikwembu, Mutumbuluxi, xa swi kota ku endla sete yintshwa ya mahawu.

³² Ndza—ndza pfumela hakunene leswaku hi le—le kusuhi na xin'wana xa swilo swa matimba ku tlurisa lexi xi nga se tshamaka xi ba misava hi mpfhuka ka masiku ya Hosi Yesu. Wa vona? Wa vona? Kambe sweswi hi nga tiviwa ntsena tanishi... Swi ta va leswi swi titsongahataka swonghasi. Wa vona? Wa vona, leswi vanhu va swi vulaka swa *matimba*, Xikwembu xi swi vula “manyala.” Kambe leswi vanhu va swi vulaka *vuphukuphuku*, Xikwembu xi swi vula swa “*matimba*.” Wa vona? Swingaleswi sweswi swi hlaleleni, wa vona, swi ta va leswi swi titsongahataka lero mi nga ka mi nga hundziwi... lero mi ta swi hupa loko mi nga ri na Mfungho kwalano ku va mi swi kambela, ma swi vona. Wa vona?

³³ Xana i mani loyi a ta swi ehleketa leswaku tintshava a ti tlulatlula kukotisa makhuna lamantsongo, naswona matluka a mari karhi ma ba mavoko ya wona, loko muprefeta a humelela ku suka emananga; loyi a nga vuriwa hi Esaya, khume mbirhi wa madzana... kumbe nkombo wa madzana na khume mbirhi wa malembe emahlweni ka sweswo. Na mavoya exikandzeni xa yena hinkwaxo, na xiphemu xa dzovo ra nyimpfu, ku ri hava na phuluphiti yo chumayelela kona, a hlongoriwile etikerekenei hinkwato, kutani a yimile eribuweni ra Yordani, a ri karhi a huwelela, “Hundzukani!” Nakona u urile vanhu a ku i ntlawi wa “timhiri,” tinyoka. Kambe sweswo hileswi Xikwembu xi nga swi vula, leswaku loko Xi ta, “tintshava ti ta tlulatlula kukotisa

makhuna lamantsongo.” Wa vona? Lava va titsongahataka va swi vonile nakona a va tsakile.

³⁴ Xana a va ta swi twisia njhani leswaku... Messiah luya nkulukumba, loyi a profetiwile ku sukela emasunguleni ya Buku, eka Genesa, leswaku U ta ta, a ri Muponisi? Magandzelo hinkwawo, na vaprofeta hinkwawo, na hinkwaswo swi kombeterile eka Yena. Kutani loko A ta, laha ku ringanyetiwaka ku va ku ri hi ku velekiwa ka vuhunguki; hi tatana loyi a nga tekananga na mana wa Yena, loko ku ringanyetiwa. Wa vona? Kutani wansati u kumekile a tikile hi n'wana loko va nga se tekana. Kutani U tile hi mukhuwa wolowo, na ku tswariwa eka—eka lexintsongo... Kunene, yi ri i xitala, eBibeleni. Kambe xitala hi masiku lawaya a ku ri bakwa le ndzhaku e—le ndzhaku ekhumbini. Ndzi hlanganile na ndhawu yo tanahi yaleyo le Arizona nkarhi wun'wana, eku hloteni. A ku ri na xitala le ndzhaku ehansi ka rigiyagiya ra maribye. Kutani yaleyo i ndlela leyi Yesu a nga tswariwa hakona, le ndzhaku eka xitala lexintsongo xa rigiyagiya exitsengeleni xa furu na mungu, exivaleni xa tihomu, wa vona, laha swifuwo a swi ri kona.

³⁵ Nakona u kurisiwile tanahi Mupfuneti wa muvatli, kutani xana Yaloye a ta va Yehovia wa matimba njhani? Kambe a Swi ri tano, wa vona. A swi ri tano. Wa vona? Munhu wo tanahi loyi a nga twisisekiki. Kambe, oho, loko ntsena A ha ri Mufana, U hlamarisile vaprista hi ku tiva Rito rero. Hikuva hikokwalaho ka yini? A ri Rito. Wa vona? A ri Rito.

A nga kalanga a tsala buku. A nga kalanga a tsala e—A nga kalanga a tsala rito. Rito rin’we ntsena leri A nga tshama a ri tsala, ndza tshembha, U ri rhabile, e—e saveni, loko wansati a kumekile evuoswini. A nga kalanga a tsala rito. Hikokwalaho ka yini? A ri Rito. Wa vona? A ri Rito. A nga boheki ku Ri tsala; vutomi bya Yena byi Ri hanyile. A ri Rito. Loko A... “Loko Ndzi nga endli mintirho ya Tatana wa Mina, kutani mi nga Ndzi pfumeli.” Wa vona? “Loko Ndzi nga endli hi ku hetiseka leswi Rito ri nga vula leswaku Ndzi ta swi endla, kutani a Ndzi rona Rito. Kambe loko...” Sweswo hileswi A swi vula. Hi yena Rito.

³⁶ Swingaleswi sweswi tilulamiseleni sweswi hikokwalaho ka—ka xikhongelo lexi taka xa ku horisiwa na xilalelo. Hi nga tsaka ku va mi sala na hina loko mi swi kota. Loko mi nga swi koti, hi ta va na ku ntshuxa xikan’we-kan’we.

³⁷ Kutani mi nga rivali, ndzi khongeleleni mi khongelela na nsati wa mina, wansati wa risuna ku tlurisa emisaveni hinkwayo, na—na le ka vana va mina. Nakona sweswi ndzi va koxile, un’wana na un’wana, eka Hosi Yesu.

³⁸ Sweswi, Becky u le ka malembe lawa ntsongo ya “ricketta,” ma swi tiva, na ku va ntsena a ri—ri “sindza ra honyololo” lerintsongo, tanahi laha a hi swi vurisa xiswona. Nakona u le ka malembe yalawa sweswi. Kambe, sweswi, i nhwana wa

risuna swinene, nakona ndzi—ndzi khensa Hosi hikokwalaho ka sweswo; a nga dzahi, a nga nwi, a nga tsutsumi-tsutsumi hinkwako, a ku na nchumu. Kambe o va eka malembe yalaya, a—a nga na mhaka na nchumu. A nga swi lavi ku ya ekerekeni, nakona, loko a ya, u titshamela le ndzhaku ivi a ncakunya chungama, a tlakuka a ya ehandle. Sweswo, wa vona. Ndzi lava ku n'wi vona a tatiwile hi Moya lowo Kwetsima.

³⁹ Ndzi lava ku vona Joseph, ndzi lava leswaku mufana luya... Ndzi pfumela leswaku siku rin'wana loko ndzi nga ha swi koti ku ya ephuluphutini, ndzi lava ku teka Bibele leyi ya khale yo hlakala kutani ndzi n'wi nyika yona, ndzi ku, "Joseph, tshama na Yona, n'wananga." Kutani ndzi lulamerile ku tilhandlukela ehenhla. Ndzi lava ku twa moya wu ri karhi wu hunga kun'wana, ndzi langutisa ehenhla, ndzi tatayisa voko ra mina, ndzi famba.

A hi khongeleni.

⁴⁰ Tatana Xikwembu, vutomi bya hina hinkwabyo byi phutseriwile eka Sweswo, hikuva hi Swona Wena, nakona hi Wena Vutomi bya hina. Sweswi ku na van'wana lahwani, Hosi, lava—lava va khomaka hambi ku ri Mfungho lowu ndzi nga vulavula hi wona. Va khomelerile Mfungho wolowo, hambiswiritano va vabya. Kutani ndzi lava ku vulavula vusiku lebyi hi ku va nyika xitiya-nhlana, ku—ku va khutaza ku teka timfanelo letiya ti nga nyikiwa hi Xikwembu. Va na mfanelo ya ku hlula javulosi. U hluriwile khale, nakona ntsena o va eku va chaviseteni. Ndzi le ku va koxeni, Tatana.

⁴¹ Sweswi ndzi pfuni ku vulavula Rito. Wena vulavula ha mina, Hosi, hi tinotsinyana leti ndzi nga ti tsala lahwani, na Matsalwanyana lawa ya nga tsariwa laha. Ndza khongela leswaku U ta ndzi pfuni, Hosi, na ku nghena eRitweni na ku va nyika ripfumelo eku kwetsimisiweni ka Xikwembu. Hi Vito ra Yesu ndza khongela. Amen.

⁴² Sweswi hi xihatla, ndzi lava leswaku mi pfula eBibeleni eka Buku ya Yeremiya kavanyisa ka vu29, loko mi tsakela ku hlaya. Kumbe, loko mi nga swi tsakeli, ntsena swi tsaleni ehansi. Yeremiya, kavanyisa ka vu29. Nakona hi ya eku sunguleni hi ndzimana ya vu10 ya Yeremiya, ndzimana ya vu10 ya kavanyisa ka vu29. Nakambe, hi ya eku hlayeni ku suka eka Luka, kavanyisa ka vu16, hi sungula eka ndzimana ya vu14.

⁴³ Sweswi ndzi ya eku mi nyikenka dyondzo ya mina, loko ma ha—ma ha—ma ha phendla. Dyondzo ya mina vusiku lebyi i *Ku Haganeka*. Nakona ndzi... Ku haganeka, kutani, sweswi, ma swi tiva leswaku ku haganeka i yini.

Sweswi hi ya eku hlayeni ku suka eka Yeremiya kavanyisa ka vu29, ndzimana ya vu10.

Hikuva leswi swi vula hi Hosi, Leswaku kutaku loko malembe ya makume nkombo ya herile eBabilona Ndzi

ta mi endzela, ndzi mi endlela hi marito ya mina yo lulama, ndzi mi tlherisela exivandleni lexi.

Hikuwa Ndzi tiva mianakanyo ya mina leyi Ndzi yi anakanyaka ku kongongomana na n'wina... (Xana a swi tsokombeli sweswo?)... ku vula Hosí, hikuva i mianakanyo yo rhula, yi nga ri ya ku biha, ku mi nyika makumu lawa ya amukeriweke.

Kutani mi ta vitana eka mina, nakona mi ta famba mi ya ndzi khongela, kutani mina Ndzi ta mi yingisa.

Kutani mi ta ndzi lava, mi va mi ndzi kuma, loko mi ndzi lava hi timbilu ta n'wina hinkwato.

Kutani Ndzi ta kumiwa hi n'wina, ku vula Hosí: kutani Ndzi ta tlherisela ekule vuholonga bya n'wina, Ndzi mi hlengeleta ku suka eka hinkwawo... matiko, na ku suka emathlelweni hinkwawo laha Ndzi mi hangalaseke kona, ku vula Hosí; kutani... ta mi vuyisela nakambe eka—eka xivandla lexi Ndzi mi hangalaseke kona evuhlongeni. Ku tlhelela eka pentekosta!

Ndzi lo swi hoxa sweswo, mina hi ndzexe. A yi swi vuli sweswo. Sweswo hileswi a ndzi ri eku swi vuleni eka Kereke.

Luka 16, ku sukela eka ndzimana ya vu15, kumbe ndzimana ya vu16.

Nawu na vaprofeta a swi ri kona ku ko ku fika Yohana: hi mpfuka ka nkarhi wolowo ku fuma ka Xikwembu ka chumayeriwa, kutani un'wana na un'wana u nghena kona hi matimba.

“Un’wana na un’wana u nghena Kona hi matimba.” Ku nga ri ntseña ku nghena Kona hi ku olova, hi ku olova, kambe ku fanele ku ngheniwa Kona hi matimba. Wa vona? Sweswi, “Loko mi Ndzi lava hi timbilu ta n’wina hinkwato, kutani Ndzi ta kumeka.”

⁴⁴ Nakona Xi tshembhisile leswaku Xi ta vuya na ku tisa vanhu, lava va nga hangalaka na misava hinkwayo, endzhaku ka malembe lawaya ya makume nkombo, endzhaku ku tlhelela eYerusalem laha va nga suka kona; nakona Xi swi endlile hi ndlela yaleyo. Hi swona sweswo.

⁴⁵ Sweswi hi ya eku vulavuleni hi—hi *Ku Haganeka* eka timinetse tintsongo sweswi. Hi ntoloveló, swi teka xiyimo xa xitshuketa, ku hi hoxa eka ku haganeka. Wa vona? Swi bihile ngopfu ku va swi fanelá ku endla sweswo, kambe swivumbiwa swa ximunhu swi nonoka ngopfu emiehlekeweni ya swona, lero swi teka mhangu ya xitshuketa. Swin’wana swa pfuka, ivi loko swi pfuka, kutani swi—swi va hoxa eka ku haganeka kwaloko. Kutani hakunene, eku endléni ka sweswo hi ku haganeka, swi humesela nchumu wa xiviri lowu mi nga wona ehandle. Swi kombisa leswaku mi endliwile hi yini, hi nkarhi wa ku haganeka.

Hi ntolovelu swi kokela ehandle hinkwaswo swilo swa kahle leswi nga endzeni ka n'wina.

⁴⁶ Hi nkarhi wa rifu, ndzi twile vanhu loko va swi tiva leswaku vaya eku feni, swilo leswi va swi hlayiseke swi ri xihundla vutomi bya vona hinkwabyo, va, hi ku haganeka, a va ringeta ku swi vula. Wa vona? Kutani va ringeta ku, “Teka *leswi* kutani u swi lulamisa; famba, ndza kombela; famba, u swi endla,” wa vona, hi ku haganeka. A va fanele ku va va endlile sweswo khale, wa vona, ku nga ri ku yimela nkari wa mhangu ya xitshuketa. “Xana u nga ndzi endlela *swingere-ngere?*” Mhangu ya xitshuketa yi vanga ku haganeka. Laha, a hi fanele ku swi endla ehandle ka mhangu ya xitshuketa.

⁴⁷ Sweswi ha swi xiyisisa, vusiku lebyi, leswaku hi le ku tekeni ka swikombiso swa Paseka. Nakona Paseka a yi tekiwa hi mhangu ya xitshuketa, hi nkarhi wa ku haganeka. Ma swi xiyisisa eka—eka Eksoda kavanyisa ka vu12, na ndzimana ya vu11 ya kavanyisa ka vu12, ndzi pfumela leswaku hi yona, yi ri, “Mi ta dya Paseka leyi mi vekerile tintanghu emilengeni ya n'wina, mi tibohile swifunga, mi tamerile nhonga emavokweni ya n'wina,” wa vona, mi yi dya hi ku haganeka.

⁴⁸ A va vonile voko leri kulukumba ra Xikwembu. A va vonile mahlori ma Xona hinkwawo, kutani a va tile ehansi ka xikombiso xa Mfungho. Kutani loko va ha ri ehansi ka xikombiso xa Mfungho, va tekile xilalelo hi—hi ku haganeka, hikuva a va swi tiva hi nkarhi luwa leswaku Xikwembu a xi lulamisela ku ba hi ku avanyisa.

⁴⁹ A ku ri nkarhi wo rhurhumerisa. A ku ri nkarhi laha un'wana na un'wana a ri karhi a tikambela, hikuva Rito ra muprefeta a ri nga se tshama ri tsandzeka na kan'we. A ri khorwisiwile ku va ri ri ntiyiso. Swihi na swihi leswi a swi vuleke, swi humelerile hi ku hetiseka hi ndlela leyi a nga swi vula hakona. Langavi ra Ndzilo a ra ha ri kwalahaya. Naswona, kutani, muprefeta a tivisile leswaku Xikwembu xi ta hundza ntsena loko Xi vonile mfungho enyangweni. Nakona a ku ri ku haganeka.

⁵⁰ Ndzi anakanya leswaku vana a vari...loko va vona letiya tikulukumba, timpiku ta ntima ti xikela ehansi hi le xibakabakeni kukotisa musi loko wu tirhurhela ehenhla ka doroba, ku kalakala ku ri karhi ku huma endlwini yin'wana na yin'wana, vana va ta va yile eka papa wa vona kutani va ku, “Papa, xana u na ntiyiso leswaku hi le hansi ka mfungho luwa-ke?”

Kutani yena a ta ya enyangweni, a langutisa ehenhla ka mhandzi, rimba, a ku, “Jaha, sweswo i ku ya hi Rito ra Xona.”

“Tsundzuka, leswaku ndzi n'wana wa wena lonkulu. Papa, xana wa tiyisisa?”

⁵¹ “Ndza tiyisisa! Sweswo i ku ya hileswi muprefeta a nga hi byela swona, nakona u na Rito ra Hosi. U te, ‘Loko Ndzi

vona ngati, Ndzi ta mi hundza. Yindlu yin'wana na yin'wana yi ta va na xinyimpfana.' Ndzi mi nghenisile hinkwenu n'wina vana. Wena u n'wana wa mina lonkulu, kambe mativula ya mina. Valava hi vona lava va faka le handle; kambe hi *liya* ngati. Sweswo hi LESWI SWI VULAKA HI HOSI a swi ri xiswona. Swingaleswi wisa, jaha ra mina, wisa hi ku rhula, hikuva Xikwembu xi endlile xitshembhiso. Wa vona?"

"Kunene, Papa, hikokwalaho ka yini u ambarile tintanghu ta wena? Hikokwalaho ka yini u tamerile nhonga evokweni ra wena? Hikokwalaho ka yini u khomile xiphemu xa xinkwa evokweni rin'we na xinyimpfana evokweni lerin'wana? Hikokwalaho ka yini ku ri na matsavu lawa yo bava na swin'wana? Hikokwalaho ka yini u ri eku swi dyeni? Xana nyuku lowu khulukaka exikandzeni xa wena i wa mayelana na yini?"

"N'wananga, rifu ri le kusuhi na ku ba." Wa vona, a ku ri hi nkarhi wa ku haganeka.

⁵² Sweswi, ndzi pfumela leswaku hi hanya emasikwini lawa hi nga... Kumbe, hi mukhuva wun'wana, masiku lawa hi hanyakka eka wona a ma fanele ku endla leswaku Kereke yi ya eka ku haganeka loku ku hetisekeke. Ndzi pfumela leswaku, hi mpfhuka ka hungu ra mixo lowu ku suka eka Xikwembu, ku nga ri mina, ndzi pfumela leswaku a ri fanele ku chela nhlengeletano leyi hinkwayo eka ku haganeka, leswaku hi tlangile nkarhi wo leha ku ringana. Hi yile ekerekeni nkarhi wo leha ku ringana. Hi fanele ku endla swin'wana.

⁵³ Xana swi endlekisa ku yini leswaku hi nga kota ku vona swikombiso leswikulu na swihlamariso swi ri karhi swi endleriwa van'wana, kutani hina-ke? A swi fanele ku vanga pfindla wa ku haganeka, leswaku hi tiyimiserile, emahlweni ka Xikwembu. Swikombiso swa ku Vuya ka Xona a swi fanele ku tisa nhlengeletano leyi hinkwayo, loko hi ta va hi swi hlayile ku suka eRitweni... Moya lowo Kwetsima wu hi byerile leswaku, "Fambani endhawini yo karhi, swilo *swokarhi-na-swokarhi* swi ta humelela," ku nga ri ku hi byela leswaku a ku ri yini, kambe leswaku swi ta humelela. Hi ya kwalahaya, ivi swi humelela hi ndlela yaleyo. Maphepha-hungu ma swi paka, timagazini ta swi paka, ti kombisa xifaniso xa swona. Hi vuya endzhaku lahwani hi ta vona swihundla leswiya swi kulukumba, leswi fihliweke eBibeleni, swi pfuleriwe hina, eka nsimu yintshwa leyi hi nga se tshamaka hi yi tiva, na ku va swi fambelana hi ku hetiseka na ku Vuya ka Hosi Yesu.

⁵⁴ Kutani, emakumu ka Mahungu, vonani swendlo swa Moya lowo Kwetsima lowu kulukumba, Wu voneni loko wu xikela ehansi wu ri karhi wu vonakala emahlweni ka vanhu, hambi ku ri ku teka swifaniso swa Wona. Wu voneni wu ri karhi wu tirha na ku kombisa leswaku a hi munhu, a kova ntsena muchumayeri, a hi nhlengeletano yo karhi. I Moya lowo Kwetsima wu kombisaka

nchumu wun'we lowu Wu nga wu endla loko Wu ta va wu rhurheriwile emirini wa Yesu Kreste. Sweswi Wu rhurheriwile eMirini wa Mutekiwa wa Yena. Swi fanele ku hi hoxa eka ku haganeka.

⁵⁵ Vanhu lavaya a va vonile voko ra Xikwembu. Kutani hi vusiku lebyiya bya xilalelo, va xi tekile hi...hi ku haganeka, hikuva a va swi tiva leswaku swin'wana a swi tilulamisela ku humeleta. Kutani ha swi tiva leswaku swin'wana swi le ku tilulamiseleni ku humeleta. Nakona tsundzukani, ku Vuya ka Hosi ku ta va ka xitshuketani, ku famba ka xihundla. Yi ta vuya yi ta N'wi teka kukotisa khamba ni vusiku. Kutani ndzi ehleketa leswaku loko munhu un'wana, hi xitshuketani, ku va na swirho swa mindyangu ya hina leswi nga famba, nakona n'wina mi sele endzhaku! A swi fanele ku hi hoxa eka ku haganeka, leswaku, hi tintswalo ta Xikwembu, hi nga sali endzhaku. "Loko ku ri na nchumu lowu ndzi nga wu laviki... U nga swi endlili, u nga ndzi siyi, Hosi."

⁵⁶ Masikunya lawa ya nga hundza a ndzi yingisele Mel Johnson a ri karhi a yimbelela risimu leriya:

Ndzi tsundzuki loko mihloti yi ri karhi yi
khulukela ehansi, ina,
Ndzi tsundzuki loko vanghana va nga ha ri
ekusuhi;
Kutani loko ndzi tsemakanya nambu lowu wa
Yordani,
Loko U ri karhi u vitana mavito, ndzi
tsundzuki.

⁵⁷ Kutani eBukwini ya Xinyimpfana ya Vutomi, ndzi lava vito ra mina ri tsariwile kona. Ndzi lava leswaku Yi ndzi tsundzuka loko ku vitaniwa mavito. Nakona swi ndzi hoxa eka ku haganeka, hi leswaku, tanahi laha Paul a nge te, "Endzhaku ka loko ndzi chumayerile Evhangeli xana ndzi nga va e—e loyi a khandziyaka mangrove xana, xana ndzi nga va—nga va tshikiwani xana?" Swi nga humeleta. Swingaleswi swi ndzi hoxa eka xiyimo xa ku haganeka, ku haganeka, ku ehleketa hi swona, endzhaku ka hinkwawo malembe lawa ya ku chumayela, xana ndzi nga—xana ndzi nga...xiyimo xi fika laha ndzi nga N'wi tsandzekaka kona? Xana hi rih goza leri landzelaka? Xana ndzi fanele ku endla yini lexi nga ta landzela? Kutani swi ndzi hoxa eka xiyimo xo rhurhumela. Nakona xana ndzi nga endla yini? Swi ndzi hoxa etintshaveni na le minkoveni. Nakona swa tika, hikuva, loko ndzi ri na vanhu, ndzi fanele ku va swilo hinkwaswo eka vanhu hinkwavo, leswaku ndzi ta wina van'wana eka Kreste, hambileswi Mfungho wolowo wu vaka emahlweni ka mina nkarhi hinkwawo. Wa bona?

⁵⁸ Kutani ndzi bona swilo leswi nga eku teni, nakona u nga ka u nga swi byeli vanhu. U bona swilo swo hambana-hambana, nakona u aleriwile. Swivono leswi va swi vitanaka, nakona

nkarhi wun'wana va ta tisola loko wo va byela, naswona u tiva ku antswa ku tlula ku swi endla. Kutani u famba mpfhuka wo leha swonghasi eka swivono kukondza hinkwaswo swi hundzuka xivono, nakona swi ku hoxa eka xiyimo xa rhumbyana. U—u langutisa ivi u ku, "Sweswi xana ndzi le ka xivono?" Tanihi ku tshama lahawani, "Xana lexi i xivono? Kahle-kahle ndzi yime kwihi?" Wa vona, u—u titirhisa ku tlula mpimo wena hi wexe, u tibarisa ku tlula mpimo wena hi wexe. Kutani u kuma swilo hi mayelana na vanhu leswi a wu navela ku va u nga swi tivi. Vanhu lava va navelaka swilo leswi, ku tiva swilo leswi, a va swi lemuki leswi muxaka wa ministri wolowo wu koxaka swona. A mi swi tivi leswi swi fambaka na wona. Kutani swi ku hoxa eka ku haganeka, "Hosi Xikwembu, ndza swi tiva leswaku ndzi ta fanela ku hlamula."

⁵⁹ Jack Moore u ndzi byerile nkarhi wun'wana, "Ndzi nga venga ku fanela ku hlamula kukotisa leswi u nga ta fanela ku hlamurisa xiswona, hi Siku ra ku Avanyisa." A ku, "Xikwembu xi vekile vanhu lava emavokweni ya wena, nakona u ta boheka ku nyika vutihlamuleri eka un'wana na un'wana wa vona. U ya eku hlamuleleni ka ministri wa wena." Sweswo swi vile kwalomu ka khume ntlhanu wa malembe lawa ya nga hundza, kumbexani khume nhungu. Kutani ku sukela nkarhi wolowo, ndzi vile eka ku haganeka. Xana ndzi ta endla yini?

"Ndzi pfumeleli ndzi vula ntsena leswi U swi vulaka, Hosi. Ndzi pfumeleli ndzi va byela leswi nga Ntiyiso, kumbexani ndzi nga vuli nchumu." Swi ndzi hoxa eka ku haganeka.

⁶⁰ Kutani ku vona swikombiso swi ri karhi swi ta, ku vona Moya lowo Kwetsima wu hi yisa ehandle lahaya, na ku tisa Swilemo leswi, na ku swi tlhandleka kukotisa sweswo. Wu tisa Tinguva ta Kereke wu ta ti tlhandleka endzeni, kutani wu xikela ehansi hi Langavi lerikulu ra Ndziло endzhaku lahaya, kutani—kutani wu tipaluxa Wona hi woxe. Kutani wu xikela ehansi eka nchumu lowu landzelaka, eka Swilemo swa Nkombo, ivi wu swi paluxa. Wu swi veka hambi ku ri emaphepheni na timagazini. Kutani wu nghena wu ta teka tintsumi ta Xikwembu, tona tintsumi ta nkombo na Mahungu ya nkombo, na ku swi tiyisisa hi ku hetiseka leswi Bibele yi nga swi vula. Kutani, hi nkarhi wolowo, wu ta wu ta nghenisa Swilemo leswiya... swikombiso leswiya, ku hatima ka nkarhi wa makumu, na ku swi tisa eka vanhu na ku va byela leswaku i yini, na hinkwaswo mayelana na swona, na ku va Hosi yi ri karhi yi tirha kwalahaya yi ri karhi yi kombisa ku va yi ri kona Yona hi yoxe. Kutani, kwalahaya kukotisa mixo lowu, yi ta yi ta lava Mfungho wolowo eka munhu un'wana na un'wana. Kutani, mi vanhu va mina. Hi n'wina lava ndzi va rhandzaka, lava ni lava va yingiseleke tithepi, na swin'wana. Kutani ma swi vona leswaku swi ndzi veka eka ku haganeka ka njhani.

⁶¹ Ku haganeka. Swikombiso swa ku Vuya ka Yena swi fanele ku hoxa xirho xin'wana na xin'wana xa Kreste eka ku haganeka

sweswi, hi mayelana na mimoya-xiviri ya hina, hi mayelana na vuhlayiseki bya hina—hina—hina ku sukela sweswi. Kunene, xana hi ta helela kwihi loko ho vuyeriwa hi misava hinkwayo? Xana hi, xana hi hanyela yini? Xana mi tirhela yini? Xana mi dyela yini? Xana mi kayakayela yini? Ku hanya. Xana mi hanyela yini? Ku fa. Nakona a mi ringanelanga ku hanya kukondza mi ringanelka ku fa. I ntiyiso.

⁶² Nakona hi vona mahlori yo tala ya ku horisiwa, a swi fanele ku hi veka eka ku haganeka.

⁶³ Loko xifanyetana lexiya . . . Xana ndzi nga va ndzi langutile Manana Peckinpaugh sweswi? Xana loyi i Manana Peckinpaugh? Xana hi wena loyi a wu ri na xifanyetana lahawani, nchumu wun'wana kumbe swin'wanyana? Hikokwalaho ka yini, hi loyi wansati a tshameke kwala loyi a ndzi vulavula hi yena. Ndzi tikume ndzi langutile lahaya kutani ndzi n'wi vona.

⁶⁴ Sweswi loko Xikwembu xi nga endla sweswo eka xifanyetana lexiya, a swi fanele ku mi hoxa eka ku haganeka.

⁶⁵ Wanuna wo huma eNew Albany, a nga va a ri kona vusiku lebyi. I munghana wa Makwerhu Roberson. A ri na xifanyetana lahawani. Ndzi ehleketa leswaku nsati wa yena u tshama a va na mfukuzani nakona u horisiwile. Kutani—kutani sweswi, xifanyetana a xi ri na vuvabyi bya phika lebyo tika kukondza xi va eka xiyimo xo chavisa. Nakulorhi lontsongo, kantsongo a ti vangerile mfukuzani enkolweni, yena hi yexe. Wa vona? Kutani u tisile xifanyetana, ina, ndzi vona voko ra yena le ndzhaku, endzhaku lahaya, u khongeleriwile mixo lowu, ma swi vona.

⁶⁶ Ku haganeka! Loko nsati a ri ekusuhi na ku fa hi mfukuzani, a swi tiva leswaku Xikwembu xi nga n'wi horisa. Nakona loko ku ri hi leswaku Xikwembu xi nga horisa nsati, Xikwembu xi nga horisa mufana. Nakona swi hoxa eka xiyimo xa ku haganeka. Wa vona? Mi fanele ku ta; kutani loko mi haganekile, kutani Xikwembu xi ta mi yingisa. Kambe loko ntsena mi nonoka, mi nga ri na mhaka leswaku Xa swi endla kumbe ee, kunene, kutani sweswo swa hambana. Mi ri ma swi endla, kambe swi teka ku haganeka ku endla swona.

⁶⁷ Ndzi pfumela leswaku xivangelo xa ku va hi nga ri na ku haganeka hikokwalaho ka ku pfumala rirhandzu, Xikwembu, rirhandzu ra Xikwembu. Ndzi ehleketa leswaku rirhandzu ra Xikwembu ri vanga ku haganeka. Loko Xikwembu xi ri endzeni ka n'wina, Mfungho wu ri endzeni ka n'wina, ivi mi vona swiyimo swa minkarhi, na vanhu va ri karhi va pela evudyohweni hi ndlela leyí va endlaka hakona, swi ta mi hoxa endzeni ka ku haganeka. Ndzi pfumela leswaku swi ta swi endla.

⁶⁸ Sweswi Rito ri swi veka kahle erivaleni, loko mi lava ku swi tsala ehansi, eka Vagalatiya 5:6, leswaku, "Ripfumelo ri tirha hi rirhandzu." Wa vona? "Ripfumelo ri tirha hi rirhandzu." Nakona ndlela yin'we ntsena leyí mi nga vaka na ripfumelo, i

ku va na rirhandzu ku sungula. Hikuva, endzaku ka hinkwaswo, ripfumelo i bazela ya rirhandzu. Bazela, sweswo hakunene hi leswi—leswi ripfumelo ri nga xiswona. I bazela eka rirhandzu. Sweswi, n'wina, loko mi nga ri na rirhandzu, mi nga ka mi nga vi na ripfumelo. Wa vona?

⁶⁹ Xana u nga va na ripfumelo njhani eka nsati wa wena loko u nga n'wi rhandzi? Rero i rirhandzu ra *phileo*. Sweswi swi nga va njhani hi *agapao*, eka Xikwembu? Ri nga va kona njhani loko u nga xi rhandzi Xikwembu?

Loko u vurile leswaku u rhandza nsati wa wena, nakona u nga n'wi byeli mayelana na swona, nakona u nga tshami ehansi na ku n'wi komba rirhandzu, u ri kombisa eka yena, u n'wi ntswontswa, u n'wi vukarha, na ku n'wi byela leswaku hi yena musweki wo antswa ku tlurisa etikweni, hinkwaswo swilo leswi u swi tivaka, na hilaha a nga saseka hakona, na hilaha u n'wi rhandzaka hakona; loko u nga swi endli sweswo, a nge pfuki a swi tivile. Hi yona ndlela ya kona yaleyo. Loko u n'wi rhandza, wa swi kombisa.

⁷⁰ Yaleylo i ndlela leyi hi endlisaka xiswona eka Xikwembu. Loko hi Xi rhandza, ha Xi byela hi mayelana na swona. Hi tshama ehansi ivi hi Xi rhandza, na ku Xi gandzela. Kutani, wa vona, rirhandzu ri hi susumeta ku va hi endla sweswo.

⁷¹ Sweswi loko ku ri leswaku nchumu wun'wana wu fanele ku endleriwa nsati wa wena-ke? Hikokwalaho ka yini, swi ta ku hoxa eka ku haganeka ku endla leswaku swi endleka. Swi nga va njhani loko munhu un'wana a nga vula leswaku nsati wa wena u na mfukuzani-ke? Swi nga va njhani loko munhu u n'wana a nga vula leswaku nsati wa wena—wena u na TB, nakona u le kusuhi na ku fa-ke? Hambiswiritano, wena, u ta—u ta endla swin'wana na swin'wana. Wa vona, swi ta ku hoxa eka ku haganeka.

⁷² Kutani wolowo i nchumu wun'we na leswi ku nga xiswona. Hi fanele ku va na rirhandzu loko hi nga si va na ripfumelo. Kutani ripfumelo... Loko hi ri na rirhandzu ra xiviri, xana ri endla yini? Ri susumetela ripfumelo ra hina ehandle emahlweni ka nyimpi ya Xikwembu. Wa vona? Rirhandzu ra vukwembu ra xiviri eka Xikwembu na le ka Rito ra Xona na le ka vanhu va Xona, swi ta susumetela ripfumelo ehandle lahaya. Rirhandzu ri khoma ripfumelo, nakona ntsena ri ku, “Tana haleno, a hi fambi!” Ivi ri huma ri famba, hikuva sweswo hileswi rirhandzu ri swi endlaka.

⁷³ Yohana 14:23, Yesu u te, “Loko munhu a Ndzi rhandza, u ta hlayisa Marito ya Mina.” Sweswi u nga ka u nga ma hlayisi Marito ma Yena ehandle ka ku va na ripfumelo eka leswi A nga swi vula. Swingaleswi, ma swi vona, loko a rhandza Xikwembu, kutani u hlayisa Rito ra Xikwembu. Loko A vurile leswaku, “Hi mina Hosi leyi yi mi horisaka,” wa swi pfumela sweswo. Rirhandzu ri n'wi endla leswaku a swi pfumela, hikuva

rirhandzu ri hlula hinkwaswo. "Hambi loko ndzi vulavula hi tindzimi ta vanhu ni ta Tintsumi, ndzi nga ri na rirhandzu, a swi nchumu, wa vona. Hambiloko ndzi ri na ripfumelo ro susa tintshava, nakona ndzi nga ri na rirhandzu, a swi nchumu." Rirhandzu ri hlula hinkwaswo, hikuva Xikwembu i rirhandzu, Xikwembu xa rirhandzu. Sweswi, ina, nkulukumba! Loko Yesu a vurile leswaku, "Loko munhu a Ndzi rhandza, u ta hlayisa Marito ya Mina."

⁷⁴ Ha swi tiva leswaku i ntiyiso ku ri Xikwembu xi ta hlangana na moya-xiviri lowu haganekeke. Sweswi, hinkwerhu ha swi tiva sweswo. Kambe hi ntolovelu swi teka swin'wana ku va swi hi yisa eka sweswo, eka ku kutsakutseka kwaloko, ku ya eka ku haganeka kwaloko. Swi teka swin'wana ku swi endla.

⁷⁵ Ha swi kuma, eka Jimisi 5:15, leswaku Bibele yi vurile, leswaku, "Ku hiteka," sweswo i ku haganeka, "xikhongelo lexi xi endliwaka hi ku hiteka ka munhu loyi a lulameke xi ni matimba lamakulu. Loko munhu loyi a lulameke, munhu lonene, a chivirika," kumbe moya-xiviri wu teka rendzo, kumbe ku chivirika, ku nga ha va rin'we eka lama mbirhi. Ndzi—ndzi ehleketa leswaku ku "teka rendzo" i rito ro antswa. Ku chivirika, kumbe ku teka rendzo, hambi ku nga va rihi leri mi lavaka ku swi vitanisa xiswona. Kambe loko e—e—e moya-xiviri wu va eka ku—ku haganeka, eku chivirikeni, xikhongelo lexi endliwaka hi ku hiteka ka munhu loyi a nga kombisaka Mfungho, xi endla swin'wana. Wa vona?

⁷⁶ Xiyisisani leswi Bibele yi nga tlhela yi swi vula lahawani, eka Jimisi 16, 5:16, yi te, loko... "Ku byelana swihoxo swa hina," ku lulamisa, ku tilulamisela swona, "ku byelana swihoxo swa hina un'wana eka un'wana." Ku pfumala—pfumala swihoxo... Kombelani vanhu ku va va mi khongelela, hi ri karhi hi byelana swihoxo swa hina un'wana eka un'wana, na ku khongelelana un'wana eka un'wana. Hi sweswo. Hi rirhandzu, rirhandzu, hi leswaku ndzi na vutitshembhi leswaku ndzi mi byela xihoxo xa mina; na n'wina mi nga ndzi byela xihoxo xa n'wina. Nakona ndzi mi rhandza ku ringanelu ku va ndzi mi khongelela, na n'wina mi ndzi khongelela; kutani hi ta tshama na xona, na xikhongelo lexi endliwaka hi ku hiteka, kukondza xi hlamuriwa. Sweswo, sweswo i ku haganeka. Sweswo hileswi hi faneleke ku va na swona nkarhi hinkwawo.

⁷⁷ A hi tekeni swikombiso swin'wana swa Matsalwa eka sweswo, leswi nga humeleta, sweswi, eka tin'wana, kwalomu ka khume ntlhanu wa timinetse, loko Hosi yi swi rhandza.

⁷⁸ Yakopo, a ri munhu, eku sunguleni a ri lontsongo... muxaka wa mufana loyi a nga riki na mhaka na nchumu. A ehleketa emiehlekeweni ya yena n'winyi leswaku a swi tiva ku ri mfanelo ya ku velekiwa a yi vula hinkwaswo eka yena, nakona a nga ri na mhaka leswaku u yi kumisa ku yini, ntsena u lo kumeka a yi kumile. Nakona endzhaku kaloko a yi kumile, a ehleketa

leswaku hinkwaswo swi lulamile, hikuva a ri na mfanelo ya ku velekiwa. A ehleketa leswaku mhaka liya yi tshamisekile. Ü yile eka makwenu wa yena loko a ri karhi a twa ndlala, a ri karhi a huma enhoveni, eku tirhaneni na tihomu na ku hlota tindhakazi. Kutani makwenu wa yena, a—a lava poto leri kulu ra xiculu, tinyawa ta nhova na—na swin'wana kun'we. Swi nga va swi vile leswo naveta swinene loko munhu a ri ni ndlala, endzhaku ka ku famba siku hinkwaro. Kutani makwenu wa yena u te, “Ndzi le kusuhi na ku titivala. Ndzi nyike swin'wana swa leswi.”

Kutani yena a ku, “Kunene, ndzi...loko wo ndzi hlambanyela leswaku ndzi ta kuma mfanelo ya ku velekiwa.” Wa vona? A nga ri na mhaka na leswaku u swi endlisa ku yini, ntsena ku va a swi kuma. Nakona a ehleketa leswaku, loko a kumile mfanelo ya ku velekiwa, sweswo a swi swi tshamisekisa.

⁷⁹ Pentekosta, hi kwalaho laha mi nga tsandzeka kona! A mi ehleketa leswaku ku va mi tswariwile hi Moya, ku va mi tswariwile hi Moya wa Xikwembu, mfanelo ya ku Velekiwa, sweswo swi swi tshamisekisile. Kambe ntsena swo swi sungula. Ma tsundzuka eka hungu ra—ra ku *N'wi Yingiseni*, hilaha n'wana, endzhaku ka loko a tswariwile emutini, a hundzukaka wandzisanyana. U na timfanelo eka mfanelo ya ku velekiwa, kambe u fanele ku khorwisiwa, ku tolovetiwa vun'wana. Kutani loko a nga khorwisanga ku va e—e n'wana wo yingisa eka ku rhandza ka tata wa yena, kutani u fanele, kunene, a nga kumi e—e... a nga vi e... kuva mudyandzhaka. A nga kumi ndzhaka ya nchumu, hambileswi a ri wandzisanyana, kambe a nga kumi ndzhaka ya nchumu loko a nga ri na ku tsakela eka ntirho wa tata wakwe.

⁸⁰ Kutani loko Moya lowo Kwetsima wu wela ehenhla ka vanhu va Pentekostal ivi va sungula ku tlherisela endzhaku tinyiko na swilo leswi a swi ri ekerekeli; a va ehleketa leswaku, hikuva a va tswariwile hi Moya, sweswo a swi swi tshamisekisa. Kambe, ma swi vona, ku na ku vekiwa ka wandzisanyana. Nakona endzhaku ka loko wandzisanyana loyi a khorwisile ku va a ri wandzisanyana wa xiviri, kutani a yisiwa emahlweni ka mani na mani, kutani a tshamisiwa, na ku cinciwia tiphuraphura, ivi a tshamisiwa kwalahaya; kutani a ku ri na ku vekiwa ka wandzisanyana, leswaku a ri mudyandzaka wa hinkwaswo leswi tata wakwe a ri na swona.

⁸¹ Xikwembu xi endlile nchumu lowu fanaka hi N'wana wa Xona eNtshaveni ya Nkwetsimo. U funengetiwile hi...kumbe papa, nakona u hundzukile, na xona xiambalo xa Yena xi hatimile kukotisa dyambu, kutani rito ri ku, “Loyi i N'wana wa Mina loyi ndzi N'wi rhandzaka Loyi Ndzi n'wi tsakelaka.” Muxe ni nawu a va tsandzekile. Kutani loyi hi Yena, “N'wi yingiseni.” A vekiwile. Wa vona?

⁸² Sweswi Yakopo a ehleketa leswaku, hikuva a ri na mfanelo ya ku velekiwa, leswaku hinkwaswo swi endliliwile.

Swi vile tano hi vanhu va Pentekostal, nakona va sungurile ku kondletela, va—va vun’we, va vunharhu, va vunharhu bya tilo, na tinxaka hinkwato ta mavandla, na ku holova na ku kokelana, swi kombisile leswaku Mfungho a wu nga ri eku kombiseni. Lunya, mavondzo, timholovo, wa vona, kambe kwalano hilaha swi faneleke ku ya kona.

⁸³ Sweswi, wa vona, Yakopo a ehleketa nchumu lowu fanaka. Kambe hi ku chava, vusiku byin’wana, eka vutomi bya yena n’winyi, ku haganeka ku n’wi khomile, loko a ehleketa leswaku, “Ntsena ku tsemakanya nambu luwa lahaya, makwerhu u yimerile ku ndzi dlaya. U ya eku swi endleni.” Wa vona, mfanelo ya ku velekiwa leyi a nga yi kuma, a ku ri nchumu lowu a wu ya eku vangeni ka rifu ra yena.

Kutani nkarhi wun’wana nchumu waluwa mi wu amukelaka, tanahi Moya lowo Kwetsima, hi Wona, nakona mi tswariwa ra vumbirhi hi Moya, loko mi nga langutisi, wona nchumu wolowo wu ta mi avanyissa emakumu. Hi swona sweswo. Mati yalawayaya ya nga ponisa Nowa, ya avanyisile misava. Nchumu lowu—lowu mi nga wu vulaka vuhisekeru wu nga ha va nchumu lowu wu mi avanyisaka emakumu ka patu.

⁸⁴ Sweswi Yakopo a swi tiva leswaku vutomi bya yena a byi ri ekusuhi na ku hela. U vile na murhumiwa loyi a nga ta a ta n’wi byela leswaku makwenu wa yena, na mune wa madzana ya vavanuna lava va hlomeke, a ri eku teni ku ta hlangana na yena, a swi tiva leswaku a ri—a ri endleleni ya yena. U khomiwile hi ku chava. U rhangisile vavanuna na ntlhambi wa tihavi, na tihomu, na tinyimpfu ku ya phahlela mariyeta ya ku rhula na Esau. Kutani, endzhaku ka sweswo, u sungurile ntlawa wun’wana wu ri na nhundzu yin’wana ya swilo. Kutani a sungula ntlawa wun’wana wu ri na nhundzu yin’wana ya swilo, ku ringeta ku hlangana na yena ku sungula, ku ringeta ku hundzuluxa vukarhi bya yena. Kutani u sungule ku ehleketa, “Sweswo a swi nge n’wi siveli, hikuva a nga ha va a fumile ku tlula leswi ndzi nga xiswona. A nga swi dingi.” Kutani a teka vavasati va yena na swihlangi, ivi a va rhumela va tsemakanya, leswaku Esau a ta vona swihlangi na vavasati va yena. Kutani hakunene eka switukulwana swa yena swa xinuna na swa xisati, a nga ta va dlaya. Kutani, yena, hambiswiritano a nga ta swi endla. Xikwembu xi tiva hilaha xi nga kumaka munhu hakona. Yakopo u tsemakanyile xinambyana lexiya. Hiloko a khidzama hi matsolo ma yena.

Ma swi tiva, a ri tanahi mbabva, ku nga se fika sweswo. Ndzi khomeleni eka mavulavulelo yalawa, kambe a ri tanahi lontsongo... A ri Yakopo. *Yakopo* swi vula “mukanganyisi,” nakona sweswo hileswi a ri xiswona. Kambe ku na swin’wana leswi a swi faneleku n’wi humelela. Kwalahaya hi ku haganeka, kwalahaya loko rifu ri tshamile emahlweni ka yena . . .

⁸⁵ Ku nga ha va ku ri na vavanuna na vavasati lava va tshameke lahawani vusiku lebyi, lava, rifu ri tshamile emahlweni ka n'wina. Nakona ndlela yin'we ntsena leyi mi nga ta kota ku fikelela nchumu lowu mi nga eku wu laveni, i ku ta hi ku haganeka. "Ndzi fanele ku wu kuma, vusiku lebyi. Ndzi wu kuma sweswi, kumbe hiloko ndzi herile. Mundzuku ku ta va ku hlwerile. Ndzi fanele ku va na wona sweswi!"

Loko u khongelela nkhuvulo wa Moya lowo Kwetsima, Mfungho, u ngaku, "Kunene, sweswi ndzi ta ya ndzi ya ringeta. Hosi, ndzi, ndzi karhelenyana." Oho, ntsetselelo, tshama exitulwini xa wena! U nga kali—u nga kali u ringeta. Loko u ta, u ku, "Ndzi ta hundza eka layini ya xikhongelo; ndzi tota mafurha enhlokweni ya mina, ndzi ta vona loko swi ndzi tirhela," swi nga ha a ntswa u titshamela laha u nga kona. Kukondza u fika eka xiylimexo, kukondza kereke hinkwayo yi fika eka xiylimexo, leswaku swi le xikarhi ka rifu na vutomi, mi fanele ku va na Wona sweswi kumbe mi lova, kutani Xikwembu xi ta ta eka mbono. Swi teka ku haganeka ku tisa Xikwembu eka mbono.

⁸⁶ Yakopo u ririle ku tlula hilaha a nga tshama a rila hakona. Hi ku haganeka u huwelerile kukondza a khoma Xikwembu. Kuteloko a swi endlile, u lwile; ku nga ri ku ringana khume ntlhanu wa timinetse. U lwerile ku Xi hlayisa, eka moyaxiviri wa yena, vusiku hinkwabyo; nakona hambiswiritano a swi tiva leswaku a nga vanga na wona nkateko, kutani u swi kotile ku khomelela kukondza nkateko wu ta. U lwile hi ku haganeka kukondza nkateko wu ta. Kutani, loko a vonile...kukondza Xikwembu xi ta eka mbono. Kutani, hi ku kutsakutseka, "A ndzi nge Ku tshiki u famba," loko a sungula ku twa ku kateka ku ri karhi ku xikela ehenhla ka yena.

Vanhu vo tala va ri, "Ku kwetsima i ka Xikwembu, ndzi wu kumile sweswi." Kwalaho u kanganyisiwile. Ina! Un'wana a ku, "Oho, ndzo titwa kahle swinene, Makwerhu Branham, ndzi yile lahaya ndzi ya khongela. Oho, ku rhurhumela ku tsutsumile ehenhla ka mina." Nakona sweswo ku nga va ku vile Xikwembu. "Ndzi vonile ku vonakala loku kulukumba emahlweni ka mina." Sweswo na swona ku nga ha va ku vile Xikwembu, kambe sweswo a hi swona leswi ndzi vulavulaka hi swona.

⁸⁷ Bibele yi vurile, eka Vaheveru kavanyisa ka vu⁶, "Mpfula yi nela lavo lulama na lava nga lulamangiki, ntsena hilaha ku fanaka." Sweswi, mi teka koroni, naswona mi teka mfava, ivi mi swi veka ensin'wini. Nakona mpfula kahle-kahle yi rhumeriwa eka koroni, kambe mpfula yi nela mfava ku fana na hilaha yi nelaka koroni. Nakona, mpfula, kutani mfava wuva wu tsakile hi mpfula tanahi laha koroni yi vaka hakona, nakona i mpfula yaliya yin'we. Wona Moya luwa wo Kwetsima wu nga ha wela ehenhla ka loyi a nga pfumeriki na ku n'wi endla a tikhoma hi ndlela yaliya mupfumeri a tikhoma hakona. Kambe hi mihandzu

ya vona va tiveka; sweswo hileswi ndzi swi vulaka, wolowo i Mfungho. Nakona Da- . . .

⁸⁸ Kutani Yakopo, swa antswa, hi ku haganeka, u te, “Ndza swi tiva leswaku ndzi Ku twile, U na mina kona kwala, kambe a ndzi nge Ku tshiki u famba.”

Munhu un’wana u ma vona kahle, matitwele yo sungula, ivi a tlakuka a tlulela ehenhla na le hansi, a tsutsumela ephacisini, a ku, “Ndzi Wu kumile, ndzi Wu kumile, ndzi Wu kumile.” Oho, ee. Ahaa. Ee.

Yakopo u tshamile kwalahaya kukondza swin’wana swi humeleta, leswi nga n’wi endla a famba ku hambana, swi n’wi endla munhu loyi a hambaneke, hikokwalaho kova a tshamile kukondza sweswo swi humeleta. Kutani a kota ku. . . Bibebe yi te, “U khomelerile kukondza a hlula.” Xana munhu a nga hlurisa ku yini ehenhla ka Xikwembu? Kambe mi nga swi kota. Mi nga swi kota. Munhu a nga hlula ehenhla ka Xikwembu.

⁸⁹ Nkarhi wun’wana a ku ri na wanuna loyi a thyiwile Hezekiya, a byeriwile hi muprofeta, “LESWI SWI VULAKA HI HOŠI, u ya eku feni.” Hezekiya a hundzuluxela xikandza xa yena ekhumbhini, kutani hi ku haganeka a rila, “Hosi, ndzi tsundzuke. Ndzi fambile emahlweni ka Wena hi mbilu leyi hetisekeke, nakona ndzi lava khume ntlhanu wa malembe yo engetelela,” endzhaku ka ku va Xikwembu xi n’wi byerile leswaku swin’wana a swi ya eku humeleteni, a ya eku feni. Kutani, hi ku haganeka, u cincile nonganoko wa Xikwembu. Ku haganeka, hambiswiritano, u ririle hi xiviti hi ku haganeka.

⁹⁰ Yakopo u tshamile kwalahaya kukondza nkateko wu ta, na ku cinca vito ra yena ku suka eka “mukanganyisi” ku ya eka “hosana na Xikwembu.” Hambi ku ri tiko ri vitaniwile hi vito ra yena. Ina, nkulukumba! Xana a ku ri yini? Mbuyelo a wuri kona hikokwalaho kova a haganekile hi mayelana na nchumu luwa. Kutani hi siku leri landzelakola loko a hlanganile na Esau, a nga lavi varindzi. U yile kwalahaya a ya hlangana na yena. Wa vona? Hikokwalaho ka yini? U khomiwile hi ku haganeka kukondza a kuma xitiyisiso.

Kutani mi khomiwa hi ku haganeka kukondza mi kuma xitiyisiso. Loko mi nga swi endli, mi nga kali mi ta ku ta khongeleriwa. Mi nga kali mi ta ku ya e altareni. Yimani kukondza swi va exikarhi ka vutomi na rifu, eka n’wina, kutani swin’wana swi ta humeleta. Kunene-nene, ku haganeka!

⁹¹ Ruti u haganekile, nkarhi wun’wana, loko a yimile na Naomi. Xana u ta fanelu ku thelela eka varikwavo, eka hinkwaswo leswi a swi rhandza, na hinkwaswo leswi a—a swi gandzela, swikwembu swa yena na varikwavo, kumbe xana a nga namarhela eka Naomi? Xana u fanele ku endla yini? Kutani u khomiwile hi ku haganeka, ivi a huwelela, “Laha u yaka kona, ndzi ya kona. Laha u hanyaka kona, ndzi ta hanya kona. Laha u

nga ta fela kona, ndzi ta fela kona. Laha u nga ta lahliwa kona, ndzi ta lahla . . . kumbe ndzi ta lahliwa kona. Kutani Xikwembu xa wena xi ta va Xikwembu xa mina.” Hi sweswo, ku haganeka! Xikwembu xi n’wi katekisile, xi n’wi nyika wandzisanyana, Obed. Obed a kuma Yese. Yese a kuma, ha Yese, ku tile Yesu. Hikokwalaho, ka ku haganeka!

⁹² Kukotisa nghwavava leyintsongo, Rahab, a haganekile. A swi tiva leswaku rifu a ri tshamile emahlweni ka yena. A ri ehansi ka ku avanyisiwa. Kutani u khomiwile hi ku haganeka, a ku, “Ndzi ta mi tumbeta n’wina tinhlorhi. Ndzi ta endla swin’wana na swin’wana. Ntsena, hlambanyani eka Xikwembu xa n’wina, kutani yindlu ya mina yi ta yima.” Hi sweswo.

Wanuna a ku, “Ndzi ta . . . Loko wo teka mfungho lowu, yi ta yima.”

⁹³ Eliyeza u khomiwile hi ku haganeka loko vutihlamuleri byi vekiwile ehenhla ka yena bya ku hlotela Isak mutekiwa. Eliyeza wa le Damaska a ri wanuna wa kahle. A rhandziwa hi Abraham, nakona a tshembhiwa hi Abraham ku va a famba a ya hlotu mutekiwa, mutekiwa wa muxaka lowunene, eka n’wana wa yena, Isak. Ha sweswo a ku ta humelerisiwa Kreste.

⁹⁴ Sweswi, Eliyeza, ku va a ri wanuna wo khongela, a swi tiva leswaku swi vula yini. Muxaka wa kahle wa wansati a fanele ku va nsati wa wanuna luya—luya. Kutani xana a ta n’wi hlawurisa ku yini? Eka awara ya ku haganeka ka yena, loko a fika edorobeni, u khongerile kutani a ku, “Hosi Xikwembu!” Hi wolowo nchumu wa kona. Loko u khomiwala hi ku haganeka, yana eku khongeleni. “Hosi Xikwembu, endla leswaku wanhwana wo rhanga loyi a nga ta humelela ivi a kela tikamela mati, kutani a ndzi nyika ndzi nwa, ku va yena.” U khongerile eka awara ya yena ya ku haganeka.

⁹⁵ Rebekah, wanhwana wo saseka, u tile, a kela tikamela mati. Kutani wanuna a ku, “U nga ndzi khomeleti endleleni ya mina.” Wanhwana a fanele ku fika eka nkarhi wa xiboho loko a ta famba. A ri xifananiso xa Mutekiwa. Xana a nga ha—xana a nga ha famba a ya tekana na wanuna loyi a nga se tshamaka a n’wi vona? Sweswi, wolowo i nchumu wa kahle. A nga se tshama a n’wi vona, hambiswiritano ntsena a twile hi nandza wa yena.

⁹⁶ Xexo i xifananiso xa Mutekiwa. A mi se tshama mi vona Kreste. Kambe ma swi twa, hi malandza ya Yena, leswaku U yini. Mi xavisa hinkwaswo, mi sukela makaya ya n’wina, na hinkwaswo leswi lavekaka, ku ya mi ya N’wi kuma. Sweswi xiyisisani, kutani u endlile xiboho, xifananiso xa Mutekiwa, u sukerile kaya ra yena ra xidinominexini, wa vona, ku va a famba.

⁹⁷ Yonas, u cukumeteriwe ehandle ka xikepe hi nkarhi wa xidzedze, ku ya ehansi ka lwandle, endzeni ka khwiri ra nkava-va-nga-heti. Ku tshembha hinkwako ka ku hanya a ku herile. Kambe swi endlekile ku va swi ta emiehlekeweni ya yena

leswaku Solomon, hi ku katekisa tempele, u te, "Hosi, loko vanhu va va ekhombyeni kwihi kumbe kwihi, ivi va hundzuluka ku kongomana na tempele leyi ivi va khongela, kutani u yingisa." Kutani hi ku hundzuluka ekhwirini ra nkava-va-nga-heti, u kotile ku fika kun'wana ematsolweni ya yena, ndza anakanya, na mahlanta ya nkava-va-nga-heti emirini wa yena hinkwawo.

Kwalahaya u khongerile hi ku haganeka. Nakona eka sweswo, ku haganeka; ntsena ku hefemula kuntsongo ka moyo hi loku a ri na kona ekhwirini ra nkava-va-nga-heti. Kutani hi ku hefemula lokuya kuntsongo loku a ri karhi a ku koka, kumbexani a nga swi tivi leswaku a langutile kwihi, kutani a ku, "Hosi, ndzi pfumela leswaku ndzi langutile ehenhla ku kongomana na tempele ya Wena." Nakona hi ku hefemula kuntsongo loku a ku sele, hi ku haganeka, u khongerile, ehansi ka swiyimo leswiya. A swi nga se tshama swi endliya, kambe a haganekile. U khongerile, kutani Xikwembu xi n'wi hlayisile a hanya ku ringana masiku manharhu na vusiku bya kona, na ku n'wi yisa endhawini leyi a fanele ku yisa hungu ra yena kona. Ku haganeka!

⁹⁸ Anna, wansati wa mhika eBibeleni, a lava n'wana, nakona u titsonile swakudya hikokwalaho ka yena. Kutani u titsonile na ku khongela kukondza na yena muprista etempeleni a nga ehleketa leswaku a pyopyiwile. A ri eka ku haganeka swonghasi! Loko vavasati lavan'wana va ri karhi va hlalela leswaku i xihuku xa muxaka muni lexi un'wana wa vona a xi ambaleke; nakona ma swi tiva ku ri swi fambisa ku yini; kutani lavan'wana va ri karhi va vona leswaku i swiambalo swa muxaka muni leswi a va swi ambarile, na ku vulavula hi mayelana na swilo leswi a swi ri karhi swi humelela epurasini. Kambe ku nga ri Anna; u hundzile hi le xikarhi ka ntshungu luwa hinkwawo kutani a ya e altarini. A ri karhi a titsona. A lava leswaku ku soleka ka yena ku susiwa.

I ku hambana ka njhani namuntlha. Swi le kusuhi na ku va xisolo ku va na n'wana. Kutani a ku ri—a ku ri xisolo ku va u nga ri na yena.

Kutani u khinsamile hi matsolo ya yena. Nakona a nga kalanga a xiyisisa ndzhuti wa tempele. A nga kalanga a xiyisisa muprista luya wa ndzhuti loko a ri karhi a humela ehandle. A ri eka ntshikelelo swonghasi kukondza mihloti yi khuluka ku rhelela hi marhama ya yena, nakona a ri karhi a rila, hi ku haganeka, "O Hosi Xikwembu, ndzi nyike jaha. Ndzi nyike jaha!"

⁹⁹ Kutani, xiyisisani, a nga ri na vuciva. Loko Xikwembu xi n'wi yingisile, na ku hlamlula xikhongelo xa yena kutani xi n'wi nyika jaha, u n'wi nyikerile eka Xikwembu. Kutani hikokwalaho kova a nga vanga na vuciva endzhaku ka loko Xikwembu xi hlamarile xikhongelo xa yena, Xi n'wi nyikile muprofeta. Oho, wolowo a wu ri nkateko wo engetelela. Oho, Xi tele hi swona,

swilo leswiya swo engetelela leswi Xi swi nyikaka. Ku nga ri jaha ntsena, kambe muprofeta. Nakona a ku vanga na xivono lexi nga pfuleka eka yo tala, malembe yo tala, eIsrael. Samuel, muprofeta wo rhanga, eka yo tala, malembe yo tala, hikokwalaho kova manana a haganekile; hikuva a nga kumi vana, nakona a hundzile malembe ya ku tswala, kumbexani makume ntsevu, makume nkombo wa malembe hi vukhale. Kutani u khongerile hi ku haganeka, a fanele ku va na n'wana loyi! Xana a ku ri yini? Xikwembu a xi vulavurile na yena, a swi kanakanisi.

¹⁰⁰ U nga ka u nga haganeki kukondza Xikwembu xi vulavula na wena. Oho, Kereke, pfukani mi tidzudza hi n'wexe! Tovani mapfalo ya n'wina, tipfuxeni n'wina hi n'wexe, eka awara leyi! Hi fanele ku haganeka, kumbe hi lova! Ku le ku teni ka swin'wana ku suka eka Hosi! Ndzi swi tiva tanahi LESWI SWI VULAKA HI HOSI. Ku le ku teni ka swin'wana, kutani swa antswa hi khomiwa hi ku haganeka. Swi le xikarhi ka Vutomi na rifu. Swi ta hundza hi le xikarhi ka hina nakona a hi nge swi voni.

¹⁰¹ Hikokwalaho kova a nga vanga na vuciva, u nyikiwile muprofeta.

¹⁰² Wansati wa Shunem a ri na xifanyetana lexi muprofeta a nga vula Rito ra Hosi ehenhleni ka xona, hambileswi wansati a dyuharile na nuna wa yena a dyuharile. A va nga ri na vana, kambe wansati a ri na musa eka muprofeta loyi—loyi. Nakona a swi tiva leswaku a ri wanuna wa Xikwembu. U swi vonile leswaku wanuna a xiximeka, wanuna wa xiviri. Wanuna u tile endlwini, nuna wa yena a nga ri kona, na swin'wanyana. A ri wanuna wo kwetsima. A va kota ku swi vona leswaku a ri munhu wo xiximeka. Wansati a n'wi vonile a ri karhi a endla swikombiso na masingita. A n'wi twile loko a ri karhi a vula swilo leswi a swi humelela. A ri wanuna wo xiximeka, wanuna wo kwetsima.

Wansati u byerile nuna wakwe leswaku, “Ndzi vona leswaku wanuna loyi a xweke na hina i wanuna wo kwetsima.” Manana wa muti, u swi tivile leswaku a ri wanuna wo kwetsima. Kutani u n'wi akerile xiyindlwana kwalahaya, leswaku wanuna a taka a nga xumbadzeki. A ta hundza hi kona loko a swi lava, na swin'wana. Wansati u vekerile e—e xibedwana kwalahaya, na—na jeke ya mati, na swin'wana, leswaku a ta kota ku hlamba na ku va na swin'wana swo nwa. Nakona wansati kumbexana a rhumela mutirhi wa xisati ehandle, kumbe un'wana, nandza wa xinuna, a ri na—a ri na swakudyanyana swo n'wi phamela, kutani a ta ku ta n'wi navelela e—e siku lerinene, kumbe swin'wana.

¹⁰³ Kutani, swingaleswi, loko Eliya a vona musa lowu wu endleriwa yena. Nakona swi tsariwile, “Leswi u swi endlelaka lavantsongo va Mina, u swi endlela Mina.” Swingaleswi u swi vonile sweswo, wansati a ri karhi a xixima Xikwembu loko a ri karhi a xixima muprofeta, tanahi leswi a vona Xikwembu eka

muprofeta. Kutani, swingaleswi, wansati a nga lavi nchumu eka swona. A swi nga ri hikokwalaho ka swin'wana embilwini ya yena. Ntsena a swi endla hikuva a rhandza Xikwembu. A nga swi endleli ku kateka na kun'we. U lo swi endla ntsena.

¹⁰⁴ Sweswi, Eliya a ku, "Famba u ya n'wi vutisa, xana ndzi nga n'wi vulavulela eka hosi? Ndzi munghana wa le kusuhi. Kumbe, ndhuna-nkulu, ndzi—ndzi n'wi tiva swinene. Ku na tintswalo to karhi, swin'wana leswi ndzi nga n'wi endlelaka swona, ndzi lava ku n'wi nyika swin'wana eka leswi a nga va xiswona eka mina. U—u ndzi phamerile. U ndzi pfumelerile ndzi etlela emibedweni wa yena. Nakona—nakona u vile kahle swinene eka hina. Sweswi xana ndzi nga endla yini?"

Wansati a ku, "Ee, ndzi akile exikarhi ka varikwavo. Hi—hi tshamisekile. Hi na swo tihanyisa hi swona, nakona hi sweswo ntsena. A hi pfumali nchumu."

Kutani Gehazi a ku ka yena, "Kambe a nga na vana."

¹⁰⁵ Ku nga si va khale Gehazi a swi vonile, a swi kanakanisi leswaku muprofeta u vonile xivono, hikuva u te, "LESWI SWI VULAKA HI HOSI. Famba u ya n'wi byela, hi nkarhi lowu fanaka, kumbe hi nkarhi lowu faneleke, lembe leri landzelaka ku suka sweswi, u ta xinga jaha."

¹⁰⁶ Kutani jaha ri tswariwile. Loko a ri kwalomu ka khume mbirhi wa malembe hi vukhale... Hilaha vatekani lavaya va khale va nga vaka va rhandzile xifanyetana lexi, n'wana un'we ntsena wa vona. Kutani siku rin'wana a humile a ya tshovela koroni, na tata wakwe. Ku ta va ku vile exikarhi ka siku, u biwile hi dyambu, ndza tshembha, hikuva u sungurile ku huwelela, "Nhloko ya mina." U yile a nyanya na ku nyanya. Tata wakwe a fanele ku n'wi teka ku suka emasin'wini, nakona a ku ri mhangu ya xitshuketa lahaya, laha a nga rhumela nandza, kutani a n'wi heleketa.

¹⁰⁷ Manana wakwe u n'wi vekile emindzhumbhini ya yena kukondza ku va nhlekanhi, kutani a fa. Xiyisisani, n'wana un'we ntsena wa yena, loyi a nyikiwile yena hi Hosi, hi xikhongelo na xitshembhiso xa muprofeta na LESWI SWI VULAKA HI HOSI. Wansati a swi tiva leswaku a ku ri na swin'wana swi nga hoxeka kun'wana. Ntsena a swi nga ta tirha. Xana Xikwembu a xi ta swi endisa ku yini ku n'wi nyika jaha leriya ivi xi pfumelela rirhandzu ra yena—yena ri ya eka n'wana luya? Hambiswiritano a nga kalanga a n'wi kombela n'wana luya. A dyuhale ngopfu ku va a n'wi kuma. Voko ra Xikwembu a ri fanele ku n'wi tivisa. Wanuna u swi vurile, muprofeta. Kutani kwalahaya n'wana loyi eka xiyimo lexi, u file, jaha rin'we ntsena ra yena.

Swingaleswi wansati u byerile nandza, "Ndzi lunghisele meyila, kutani u khandziya, nakona u nga yimi. Loko un'wana a ringeta ku ku yimisa, u nga hlamuli nchumu, wena u chayela u ya eNtshaveni ya Karmel. Kwale henhla endzeni ka bako kun'wana,

leri kokeriweke endzhaku, ku na nandza wa Xikwembu xa le Henhla-Henhla; loyi a nga ndzi byela leswaku, LESWI SWI VULAKA HI HOSI, ndzi ta va na n'wana. Ndzi lava ku tiva leswaku hikokwalaho ka yini Xikwembu xi endlile leswi." Swingaleswi u te... "Famba u nga languti endzhaku naswona u nga yi kambi meyila yaleyo. Yi tshike yi tsutsuma hi matimba hinkwawo lawa ya nga eka yona. Yi tshike yi tsutsuma kukondza u fika kwalahaya." Ku haganeka!

¹⁰⁸ Hi loko Eliya muprofeta a tlakuka, a langutisa, ivi a ku, "Hi loyi Mushunem luya a taka, nakona, yena, swin'wana swi hoxekile ha yena. Xikwembu xi ndzi fihlerile swona. A ndzi swi tivi leswaku i yini swi nga hoxeka." A ku, "Famba, u ya hlangana na yena. Ndzi na... A hi hatlisi. Ku na swin'wana swi nga hoxeka."

Ku haganeka ku nghenile eka muprofeta, ku haganeka eka wansati. Wa vona, a va ri karhi va hlangana kun'we; un'we a ri karhi a lava ku tiva leswi Rito ra Hosi a ri vula swona, nakona loyi un'wana a nga swi tivi leswi Rito ra Hosi a ri vula swona. Hi sweswo. Un'we a lava ku ri tiva, nakona loyi un'wana a nga ri tivi. Wansati a lava ku ri tiva, nakona muprofeta a nga ri tivi. A ku, "Xikwembu xi ndzi fihlerile swona. A ndzi swi tivi leswi ndzi nga ta n'wi byela swona loko a fika lahawani."

Swingaleswi a lava ku fika kwalahaya. Wanuna a yimisa voko ra yena, a ku, "Xana swi tshamisekile hinkwaswo hi wena? Hinkwaswo swi tshamisekile hi nuna wa wena ke? Xana hinkwaswo swi tshamisekile hi n'wana wa wena ke?"

¹⁰⁹ Sweswi, wansati a fikile emakumu ka ku haganeka ka yena. U te, "Hinkwaswo swi tshamisekile!" Ku kwetsima! "Hinkwaswo swi tshamisekile!" Ku haganeka ka yena a ku herile. A kumile nandza wa Hosi. Loko ku ri leswaku a nga ri kona lahaya, wansati a ta va a ha ri na ku haganeka. Kambe, ma swi vona, a ri kona. Wansati a ku, "Hinkwaswo swi tshamisekile!"

Elixa a ehleketa, "Kunene, xana ku humelela yini sweswi?"

¹¹⁰ Swingaleswi wansati u tsutsumile a ya wela emilengeni ya yena. Sweswo a swi languteka swi nga tololekanga, swingaleswi Gehazi ntseña u lo n'wi pfuxa. A ku, "N'wi tshike, u nga swi endli sweswo." Eliya a byela nandza wa yena, "U nga swi endli sweswo. N'wi tshike a ri yexe. Ku na swin'wana swi nga hoxeka. Xikwembu xi ndzi fihlela swona." Kutani wansati a n'wi paluxela leswaku n'wana a file.

¹¹¹ Sweswi, muprofeta a nga swi tivi leswi a fanele ku swi endla. A ku, "Gehazi, teka nhonga leyi ndzi nga famba ha yona." A swi tiva leswaku xin'wana na xin'wana lexi a xi khumbha a xi katekisiwile, hikuva a ku nga ri yena, a ku ri Xikwembu endzeni ka yena. A swi tiva leswaku hi yena mani. A swi tiva leswaku a ri muprofeta. Swingaleswi u rholerile nhonga leyi kutani a

ku, "Gehazi, wena teka leyi, ivi u famba u ya yi tlhandleka ehenhla ka n'wana. Kungaku loko un'wana a vulavula na wena, wena u khomiwa hi ku haganeka. Nakona u nga xeweti munhu, nakona u nga pfumeleli... Ntsena yana emahlweni u famba, u nga vulavuli na munhu. Yi tlhandleki ehenhla ka n'wana."

¹¹² Kambe, wansati, sweswo a swi hetanga ku haganeka ka yena. Sweswo a swi enetisanga leswi a tile hikokwalaho ka swona. A ku, "Tanihi laha Hosi Xikwembu a hanyaka, ndzi—ndzi nga ka ndzi nga ku tshiki kukondza u ya ministarela n'wana."

¹¹³ Kutani Eliya a khomiwa hi ku haganeka. Kutani hiloko a famba, ku rhelela hi patu, yena ni wansati. Kuteloko va fika kwalahaya, e... vanhu hinkwavo a va ri ehandle ka jarata, va ri karhi va kalakala na ku rila. Nakona wansati a endlile nchumu lowu faneleke ku tlurisa lowu nga endliwaka. U tekile n'wana a ya n'wi lata emubedweni lowu Eliya a nga etlela kona. Sweswo a swi ri kahle kukotisa nhonga ya yena. Nakona n'wana a nga pfukanga lahaya, swingaleswi nchumu luwa a wu tirhangga. Wansati a lava ku tiva swin'wana leswi hambaneke.

¹¹⁴ Muprefeta u nghanile endzeni. Sweswi a haganekile. Sweswi xana u ya eku endleni ka yini-ke? Kutani hi kuma eBibeleni leswaku u yile ehenhla na le hansi, a haganekile. "A ndzi tivi swin'wana swo swi endla, Hosi. Hi mina loyi. U ndzi byerile ku vulavula na wansati luya, na LESWI SWI VULAKA HI HOSI. Nakona swi vile hi ndlela yaliya ndzi nga n'wi byela hakona, hikuva U ndzi byerile. Sweswi, hi luya a nga ekhombyeni, naswona a ndzi tivi xo xi endla. Hi luya mufana loyi a feke a nga pavalala lahaya. Xana ndzi nga endla yini, Hosi?"

¹¹⁵ A swi kanakanisi leswaku Moya lowo Kwetsima wu te, "Loko Xikwembu xi ri endzeni ka wena, kutani titlhandleki ehenhla ka n'wana." Nchumu wo sungula lowu mi wu tivaka, u yimile, a tsutsuma a ya tlhandleka mavoko ya yena ehenhla ka ya n'wana, nhompfu ya yena ehenhla ka ya n'wana, milomu ya yena ehenhla ka ya n'wana. Kuteloko a titlhandlekile ehenhla ka n'wana, n'wana u entshemurile ka nkombo. Ku haganeka a ku herile.

N'wana u vuyerile evuton'wini, hikuva ku haganeka ku yisile wansati eka muprefeta, naswona ku haganeka ku yisile muprefeta eka n'wana. Kutani ku haganeka eka vona ha vambirhi ku yisile Xikwembu eka mbono. Hi rirhandzu ra Xikwembu, na rirhandzu eka vanhu varikwavo, u tisile rirhandzu ra Xikwembu ehansi, kutani swi hoxa ripfumelo emahlweni ka nyimpi, kutani ntirho wu endlekile. Mhaka yi pfariwa. Amen! Hi sweswo. Ku haganeka ka swi endla. Hakunene! Wansati a nga ta famba.

¹¹⁶ Bartimiya wa bofu a ehleketa leswaku Yesu a ya hundza hi le ka yena, a tshamile ehandle lahaya nyangweni, mukomberi wa bofu, a kombela mihanano. Nchumu wo sungula lowu mi wu tivaka, u twile huwa; Yesu a ri karhi a hundza kwalahaya. A ku,

“I mani loyi a nga eku hundzeni lahawani?” Munhu un’wana a n’wi susumetela ehansi. Yena a ku, “Ndza kombela, un’wana, i mani loyi a nga eku hundzeni lahawani?”

Un’wana wa vona, kunene, kumbexani wansati lonene wa mudyondzisiwa, a n’wi byela, a ku, “Nkulukumba, xana a wu swi tivi leswaku i Mani loyi a nga eku hundzeni lahawani?”

“Ee. Ndzi twa van’wana va vona va ku, ‘Kuna swilahlo hinkwaswo leswi nga tala hi vanhu vo fa lahawani. Loko u pfuxa vafi, famba u ya va pfuxa.’ Xana ku nga va ku ri musandzi kumbe un’wana?”

“Ee. Xana u kale u twa hi ta Muprofeta yaloye wa Galeliya, Muprofeta luya lontsongo a vuriwaka Yesu wa Nazareta?”

“Ee.”

“Kunene, wa swi tiva, eBibeleni swa vuriwa eka matsalwa-songa ya hina leswaku N’wana wa Davhida u ta pfuxiwa ku va a ya tshama eka xona. Hi Yena yaloye.”

“Xana hi Yena luya? Xana hi Yena luya, nakona U le ku hundzeni?”

Ku haganeka ku endle leswaku a kalakala, “O Yesu, Wena N’wana Davhida, ndzi twele vusiwana!”

U nga ndzi hundzi, O Muponisi wo olova,
Yingisa xirilo xa mina xo titsongahata;
Loko U ri karhi u vitana lavan’wana,
U nga ndzi hundzi.

“O Yesu!”

Van’wana va vona va ku, “Miyela! U ba huwa ngopfu.”

¹¹⁷ Kambe a haganekile. Loko A lo hundza, a ta va a nga ha kumanga nkateko wun’wana. Na hina hi nga ha va hi nga ri na wona; lebyi byi nga ha va byi ri vusiku byo hetelela. Ku haganeka! A kalakala, “O Yesu!” Swi nga ri na mhaka leswaku i mani a n’wi byelaka ku miyela, yena u ririle hilaha ku fanaka, a rhasa ku tlurisa. Loko va n’wi byela ku miyela, swi n’wi endlile a nyanya ku rhasa. A haganekile. A ku ri hava loyi a ta n’wi miyeta. “Wena N’wana Davhida, ndzi twele vusiwana!” Nakona a kalakala hi ku haganeka.

¹¹⁸ Kutani N’wana wa Xikwembu, na swidyoho swa misava ehenhla ka makatla ya Yena, a ri karhi a ya eYerusalem ku ya eku nyiketiweni, xikan’we-kan’we, ku va gandzelo ra misava, u yimile endleleni ya Yena. Ku haganeka, ku rila ka ku kutsakutseka, ku yimisile N’wana wa Xikwembu. A ku, “Xana u lava Ndzi ku endlela yini?” Oho!

A ku, “Hosi, leswaku ndzi pfuleka mahlo.”

Yena a ku, “Tifambeli hi ndlela ya wena, ripfumelo ra wena ri ku hanyisile.”

Sweswo a swi enerile. Ku haganeka! Loko ku haganeka ku ri ka ku amukela swin'wana, ku khumba lokuya kuntsongo, ripfumelo ra ku vutla. Wa vona? A nga te, "Sweswi yimanyana, yimanyana, khomelela kwalano ntsena xinkadyana, u nge ndzi vona loko ndzi ta vona sweswi. A ndzi se tshama ndzi vona mavoko ya mina, eka malembe lawa yo tala. A hi voni loko ndzi ta ma vona. A ndzi se vona nchumu." Loko Yesu a ku, "Ripfumelo ra wena ri ku hanyisile," sweswo a swi enerile. Sweswo hileswi a swi lava.

¹¹⁹ Ku haganeka ku vitanelo dyondzo, kutani loko dyondzo, swi nga ri na mhaka leswaku i yintsongo njhani, ya amukeriwa, yi pfumeriwa xikan'we-kan'we, hikuva ripfumelo ra khomelela loko ku haganeka ku ri karhi ku ri susumeta. Wa vona? Rirhandzu kwallahaya ri tipfanganyeta na rona. Ku haganeka ka swi endla.

Bartimiya wa bofu u khomile xivono hi xihatla.

¹²⁰ Petro, a virile, vusiku byin'wana elwandle, loko a ta khomiwa hi ku haganeka. Kutani u sungurile ku rila, "Kuna swin'wana swo hoxeka. Ndzi vona xipuku xi nga eku teni, xi ta eka mina!" Xikepe a xi ri ekusuhi na ku mbombomela. A ku, "Loko ku ri Wena, Hosi, ndzi lerise leswaku ndzi ta eka Wena hi le henhla ka mati." Nakona u chikile exikepeni ivi a famba; kutani u khomiwile hi ku chuhwa loko a ri karhi a famba, ivi a sungula ku mbombomela, kutani ku haganeka... Hambi leswi a ku ri xihoxo, eku ringetenka ku landzelela swileriso swa Xikwembu, ... Ndzi tshembha leswaku kereke ya swi kuma sweswo. Wanuna loyi a ri karhi a endla leswi Xikwembu xi nga n'wi byela ku va a swi endla.

¹²¹ Sweswi, wena Mukreste vusiku lebyi, u le ntleni wa ntirho, ku ringeta ku landzela vurhangeri bya Moya lowo Kwetsima; nakona mfukuzani yi ku vutlile, kumbe e—e rifu ri ku vutlile, mfukuzani, rifuva, hambi ku nga va yini. Entileni wa ntirho, u na mfanelo leyi fanaka ni leyi Petro a nga va na yona.

"Hosi, ndzi ponise, kumbe ndzi nga lova." Hi ku haganeka u kalakarile, ivi voko ri humelela ri ta n'wi tlakula. U na nchumu lowu fanaka. Kambe u kalakarile, "Ndzi ponise, Hosi!"

U yingisile xirilo xa mina xa ku kutsakutseka,
U ndzi tlakusile ku suka ematini, sweswi ndzi
hlayisekile. Wa vona?

¹²² Hi sweswo, loko u rilela ehandle!

¹²³ Kumbexani wansati loyi, manana, hambi a ri yini eka yena, wandzisanyana, kumbe ntukulu, kumbe ntukulu wa xinuna, hambi a ri yini, u ririle hi ku kutsakutseka. Xikwembu xi yingisa.

¹²⁴ Kutani hi kuma leswaku, eku nweleni, Xikwembu xi n'wi yingisile. Entileni wa ntirho, u sungurile ku mbombomela. U

tsandzekile. Swi nga ri na mhaka loko u tsandzeka, sweswo a swi na nchumu xo xi endla hi swona. Hinkwerhu ha tsandzeka. Hi vatsandzeki, xo sungula. Kambe hi na Un'wana a yimeke sweswi ni voko ro tiya, Loyi a nga hi fikelelaka na ku hi yisa ehenhla ka mati.

¹²⁵ Loko ku ri leswaku mi endlile xihoxo, wansati un'wana a endlile xihoxo, wanuna un'wana a endlile xihoxo, mufana un'wana kumbe wanhwana a endlile xihoxo; mi nga mbombomeli. Kalakalani, hi ku kutsakutseka, "Hosi, ndzi ponise, kumbe ndzi nga lova!" Khomiwani hi ku haganeka mayelana na swona. Xikwembu xi ta mi yingisa. Hi minkarhi hinkwayo xa yingisa moy-a-xiviri lowu haganekeke. Sweswo hileswi ndzi ringetaka ku mi byela mayelana na swona.

¹²⁶ Hosi ya hina Yesu loyi a rhandzekaka, hi Yexe, enyimpini leyi kulukumba ku tlurisa emisaveni, Getsemani, U ririle, hi ku kutsakutseka. Xana A nga ha teka swidyoho swa misava, kumbe A nga ha titshamela kwala misaveni na vadyondzisiwa va Yena lava rhandzekaka, leswi A lava ku swi endla? Kambe vonani yumunhu bya Yena loko A titsongahata hi Yexe, "Ku nga ri ku rhandza ka Mina kambe a ku endlive ku rhandza ka Wena," A titsongahata eka Rito, Rito leri nga tshembhisiwa ra Xikwembu xa le Tilweni.

Xiyisisani, kutani, U yile emahlweninyana. Kutani loko ku ri leswaku U yile emahlweninyana, xana i ka ngani laha hina hi faneleke ku ya emahlweninyana. Wa vona? Kutani xiyisisani, Matsalwa ya vula lahwani, eka Luka, leswaku U khongerile hi ku hiteka. Boti, sesi, loko ku ri leswaku Yesu a fanele ku khongela hi ku hiteka, i ka ngani laha hina hi faneleke ku khongela hi ku hiteka. Loko ku ri leswaku Kreste, Xikwembu xa Matilo, lexi endliveke nyama, a xi fanele ku khongela hi ku hiteka, kutani i ka ngani laha hina, vadyohi lava nga ponisiwa hi tintswalo, hi faneleke ku khongela hi ku hiteka! Loko-loko ku ri leswaku xiboho xi hoxile N'wana wa Xikwembu eka ku kutsakutseka, xana xi ta endla yini eka wena na mina? Hi boheka ku rila hi ku haganeka.

¹²⁷ Xikwembu, eka masiku lawa yo hetelela, xi tivonakarisile hi Xoxe eka hina, hi swikombiso swa Xona leswikulu na matimba, swi fanele ku hi endla hi haganeka. Hi swona sweswo. Naswona ku rhandza ka Xona ku va xi hi horisa na ku hi ponisa, a swi fanele ku hi hoxa hinkwerhu eka ku haganeka ku kuma Ribye leriya ro horisa. Hi swona sweswo.

¹²⁸ Vonani, loko ku ri leswaku Florence Nightingale... Ntukulu-xindhuwa wa sirha Florence Nightingale loyi a nga sungula Red Cross. Mi n'wi vonile eka xifaniso ebukwini, a tika kwalomu ka makume nharhu wa tipondho. Mfukuzani a yi n'wi dyile. E London, England; va n'wi tisile ku suka eAfrica, ku ya eLondon, England. Kutani kwalahaya hi ku kutsakutseka...

Makwerhu Bosworth u n'wi tsalerile a n'wi hlamula na ku n'wi byela, a ku, "Hi nga ka hi nga ti eAfrica."

¹²⁹ Na yena a tsala a hlamula, u endlile leswaku muongori a tsala na ku vula leswaku, "A ndzi suseki. Ndzi nga ka ndzi nga swi koti."

Ndzi kombisile xifaniso. Mi xi vonile xifaniso. Ntsena a hi fanele ku vekela xiphemunyana ehenhla ka xona. Ntsena a xova na ntambu ku rhendzeleka na xona. A ndzi ehleketa leswaku kumbexani munhu un'wana, loko xi vekiwile ebukwini, a nga ha sandza hikokwalaho kova wansati a nga...miri wa yena a wu ri erivaleni kwalahaya, lero...kutani hi vekerile nchumu wuntsongo hi ku n'wi hingakanya *lahawani*. Ntsena o va na-na xilapani, thawula leri a ri tlhandlekiwile, ku hingakanya mindzhumbhi ya yena. Kambe hala henhla, a ku nga ri na nchumu. Nakona hambi...Kambe a hi ehleketa leswaku hi nga ha vekela xiphemunyana xa phepha kwalahaya ivi hi teka xinepe xa...hi teka xinepe xa sweswo. Swi veka vanhu lava nga riki na xiylimoxa kahle emiehleketweni ya vona eka ku ehleketa, leswaku va nga koti ku ndzi sandza hikuva ndzi vekile xifaniso xexo ephepheni.

¹³⁰ Kutani loko dokodela a vurile leswaku wansati a nga ka a nga susiwi, nakona yena a swi tiva leswaku mina ndzi ya endzela eEngland, u endlile leswaku va n'wi vekela eka mubedo wa vavabyi, kutani va n'wi yisa eka xihaha-mpfhuka, va n'wi tisa eLondon, England, kutani va rhumela murindzi eka xihaha-mpfhuka loko a nga seya eBuckingham Palace, va rhumela murindzi kwalahaya ku ta a ta n'wi khongelela. Nakona a fambile swonghasi kukondza a nga ha swi koti na ku vulavula na mina. A vo fanela ku yimisa mavoko ya yena ku va ma tlhandlekiwa ehenhla ka ya mina.

¹³¹ Ma swi tiva hilaha London ri nga hakona, van'wana va n'wina masocha mi vile kona kwalahaya. Ku tshama ku ri na nkungwa swonghasi. Kutani ndzi khinsamile kwalahaya etlhelo ka fasitere, kutani yena...

Mihloti a yi ri karhi yi khuluka. A lava ku...A ndzi swi tivi leswaku u wu kumise ku yini ndzhongho wo ringanelu ku pfumelela mihloti yi huma. A kova ntsena marhambu, nhlonge ehenhla ka wona; kutani milenge ya yena—yena laha emindzhumbhini a yi nga hundzi kwalomu ka, a swi languteka eka mina, tanahi kwalomu ka tiinchi timbirhi hi ku tsemakanya, kumbe tiinchi tinharhu. Minsiha ya yena a yi herile. Leswaku a hanyisa ku yini, a ndzi swi tivi. Mi vuye mi xi vona xifaniso xa yena.

¹³² Ndzi khinsamile hi le tlhelo ka mubedo. Sweswi, wansati a haganekile; hambi a ndzi ta ta kumbe ee, a va ta n'wi tisa, hambiswiritano. Kutani ndzi fikile ehansi lahaya, mbilu ya mina a yi ri karhi yi halaka ngati endzeni ka mina, ya ripfumelo ra

mbuyangwani ya loye, lontsongo, xivumbiwa lexi a xi ri eku feni, nakona ndzi khongerile hi mbilu hinkwayo leyi a ndzi ri na yona. Kuteloko ndzi sungula ku khongela, gugurhwani lerintsongo ri ta, ri hahela efasitereni, ri sungula ku ya ehenhla na le hansi, ri ri karhi ri nkenkela. A ndzi ehleketa leswaku i xifuwo. A ndzi nga se tshama ndzi va eEngland kambe a ndzo va na kwalomu ka awara, ntsena ku suka exitichini xa swihaha-mpfhuwa lahaya. Kutani a ndzi ehleketa leswaku a ku ri xifuwo. Kuteloko ndzi tlakuka, ivi ndzi ku, “Amen,” ri haherile ekule.

Kutani ndzi sungurile ku vutisa vamakwerhu, loko va ri twile tuva leriya. Nakona a va ri karhi va vulavula hi rona, kuteloko ndzi sungula ku vula leswaku, “Xana mi swi vonile, leswi tuva leriya a ri vula swona...” Swi humerile ehandle, “LESWI SWI VULAKA HI HOSI, u ta hanya nakona a wu nga fi.”

Nakona wa hanya namuntlha. Hikokwalaho ka yini? Ku haganeka. Ku haganeka ku endlile wansati ku va a yima, hanya kumbe u fa. Ku haganeka ku lulamisile leswaku a fika kwalahaya hi nkarhi wun’we na lowu ndzi nga fika hi wona. Kutani mfungho wo huma eka Xikwembu, Xi rhumerile tuva, ku ta hi nyika LESWI SWI VULAKA HI HOSI. Ku haganeka!

¹³³ Loko sesi, Hattie Waldrop wo dyuhala wa le Phoenix, Arizona, a ri karhi a ta hi le tlhelo ra vafambi hi milenge, eka nhlengeletano ya mina yo rhanga. Muleteriwa na nuna wa yena a va ri karhi va n’wi tisa; mfukuzani ya mbilu. A tekile ku yima ka yena, eku ringetenii ka ku fika lahaya nhlengeletanweni, kambe a nga pfukanga kahle lero a nga... a nga ha swi koti ku hefemula, ngati a yi ri karhi yi wela endzhaku embilwini ya yena laha mfukuzani a yi dyile yi nghena embilwini ya yena. Sweswi, mfukuzani ya mbilu! Sweswo hi kwalomu ka khume nhungu, khume nkaye wa malembe lawa ya nga hundza, kumbexani makume mbirhi, 1947 hiloko swi va kona.

¹³⁴ Sweswi, u byerile nuna wa yena na muleteri, “Na hambi ndzo fa eka layini leyi, ndzi yiseni kwalahaya.” Ku haganeka. U lahlekeriwile hi vutitwi bya yena. A ndzi ehleketa leswaku a file; u koxile leswaku a file. Sweswi, a nga va a file. A nga ha yi twa thepi leyi, ma swi vona. Sweswi ndzi—ndzi—ndzi... U, u koxile leswaku a file; a ndzi swi tivi. Va ndzi byerile leswaku, “Kuna wansati wo fa loyi a taka elayinini.” Kutani loko wansati a fika, a nga ri na vutomi. Kutani loko va n’wi tisa ehenhla kwalahaya, Rito ra Hosi ri tile; kutani ndzi yile ndzi ya n’wi tlhandleka mavoko, nakona u pfukile ivi a ya ekaya, a ri karhi a famba kunene. Leswi swi vile kona kwalomu ka, ndzi nga vula, hi ku hlayiseka, khume nhungu wa malembe lawa ya nga hundza, nakona ntsena u hanyile kahle emirini na ku va loyi a tsakeke... U ta va a ri eTucson ku va a hlangana na mina loko ndzi fika kwalahaya. Ku haganeka, “Hambi ndzi nga fela

endleleni, hambiswiritano, kambe ndzi fikiseni kwalahaya. U horisile van'wana, U ta ndzi horisa." Ku tiyimisela!

¹³⁵ Timbilu ta n'wina a ti tatiwe hi rirhandzu eka siku leri, kutani mi hiteka, na ku va lava haganekeke. Endzhaku ka nkarhi ku nga va ku nga ha ri na nkarhi.

¹³⁶ Yairo nkarhi wun'wana a ri na xinhwanyetana lexi a xi ri eku feni. A ri mupfumeri wa le ndzilekanini. A pfumela Yesu, kambe a chava ku swi vula, hikuva a va ta n'wi hlongola le sinagogeni. Kambe dokodela u tile siku rin'wana eka mixo wun'wana, kutani a ku, "Xi le ku feni sweswi." Ku haganeka ku nghenile. A nga ta swi kota, hikokwalaho ka xiyimo xa yena, ku kumiwa na Yesu wa Nazareta, hikuva a ta lahlekeriwa hi xiyimo xa yena tanahi muprista.

Kambe ndza mi byela, loko xiyimo xa xitshuketa xi ta, xi n'wi hoxile eka ku haganeka. Ingaku ndza n'wi vona a ri karhi a hlotana na xibajani xa yena xa vuchumayeri na xihuku, ivi a xi tlhandleka. Hi loyi a taka hi le xikarhi ka ntshungu, a ri karhi a susumeta kwalahaya; laha a ku ri na wansati loyi a ha ku khumbha nguvu ya Ÿena, na swin'wana, nakona a va ri karhi va huwelela. Kambe u yile emahlweni ivi a ku, "N'winyi, xinhwanyetana xa mina xi ettele eka xiyimo xa kufa. N'winyi, N'winyi, xinhwanyetana xa mina xi ettele eka xiyimo xa kufa, kutani loko ntsena U nga ta u ta tlhandleka mavoko ya Wena ehenhla ka xona, xi ta hanya." Oho, mina! Ku haganeka ku mi endla mi vula swilo minkarhi yin'wana, ku endla leswaku mi endla swilo. Ku mi tekisa goza. Xinhwanyetana xa yena xi ponisiwile hi ku haganeka.

¹³⁷ A hi haganekeni, kukotisa wansati luya lontsongo loyi a ri na xiphiqo xa ngati. Bibebe yi vurile leswaku a tirhisile mali ya yena hinkwayo, eka tin'anga, kutani hambiswiritano a va swi kotanga ku n'wi pfuna. A sungurile hi nkarhi wa ku ka a nga ha voni masiku ya yena, ku va na ku halaka, na xiphiqo xa ngati, nakona a yi nga yimi. Va ta va kumbexani va xavise na purasi, timeyila, tihanci, na hambi ku nga va yini; nakona a ku ri hava lexi a xi ta n'wi pfuna. Kutani vaprista va vona a va n'wi byerile leswaku a nga tshuki a ya ekusuhi na swilo swo tanahi sweswo. Kambe emixweni wun'wana u langutisile ehansi. A tshama ehenhla ka ribuwa ra nambu, le henhla laha purasi ra yena a ri ri kona, nakona u vonile ntlawa lowukulu wa vanhu va ri karhi va hlengeletana ku rhendzelaka na Wanuna kwalahaya, kutani va ku, "Xana i yini leswiya?"

Va ku, "Luya i Yesu wa Nazareta." Ku haganeka ku nghena.

Yena a ku, "Ndzi tanahi loyi a nga lulamelangiki. Ndzi—ndzi... Kambe loko ntsena ndzi nga khumbha makumu ya nguvu ya Ÿena, ndzi ta hanyisiwa." Nakona u hundzile vasandzi hinkwavo na hinkwaswo leswin'wana. Kambe loko a fika eka ndhawu liya, u khumbhile nguvu ya Ÿena, hi ku haganeka.

Kutani loko A ta va a swi twile, A hundzuluka kutani a ku, "I mani loyi a nga Ndzi khumbha?" Kutani hinkwavo va swi kanetile. Kambe U lavalavile hinkwako. A ri na nyiko leyi kulukumba ya Xikwembu. A ri Xikwembu; kutani Ü kumile wansati lontsongo ivi a n'wi byela leswaku xiphijo xa yena xa ngati xi yimile. Ku haganeka ku endlile leswaku wansati a endla sweswo.

¹³⁸ A ku ri ku haganeka loku fambiseke—loku fambiseke hosikazi ya le Dzongeni. A yi swi twile leswaku nyiko ya Xikwembu a yi ri karhi yi tirha ha Solomon. Ku haganeka ku yi yisile eka sweswo.

¹³⁹ Hi ku haganeka! Valava i vanhu, kukotisa n'wina, kukotisa mina. A va nga ri lava hambaneke eka n'wina na mina. A va ri na switwi swa ntlanhu. A va dya, na ku nwa, na swin'wana, kukotisa hilaha hi endlaka hakona, ku hanya na ku fa. A va ri vanhu.

¹⁴⁰ Swi yisile wansati eka ku haganeka ko tanahi kwaloko kukondza a teka xiphemu xa mfumo wa yena. Swi n'wi yisile eka xiylimi laha a nga ha ehleketi hi Vaishmael lava a va ta n'wi phanghela emananga, eka masiku ya yena ya makume nkaye ehenhla ka kamela ku tsemakanya Sahara Desert. Ku haganeka! U ya kona, hambiswiritano. Kuteloko a fika kwalahaya, a ku vanga na nchumu lowu a nga fihleriwa wona ku suka eka Solomon kambe u n'wi byerile swilo leswi a lava ku swi tiva. Ku haganeka! Yesu u te, "U ta pfuka hi Siku ra ku Avanyisa, na rixaka leri, kutani a ri avanyisa, hikuva lo nkulukumba eka Solomon a ri kona." Ku haganeka!

¹⁴¹ Hi ku pfala ndzi nga ha vula leswi. Ku nga ri khale ngopfu, ehansi le Mexico, ndzi vonile swin'wana swo haganeka. A ndza ha ku fika eka platifomo, kwalahaya eka muako lowu kulukumba, nakona vanhu a va ri kwalahaya ku sukela hi awara ya nkombo emixweni wolowo, nakona a swi lava ku endla awara ya khume hi vusiku byebyo. Mukhalabya wa bofu, hi vusiku lebyi nga hundza, loyi a ri bofu hi ku hetiseka ku ringana kwalomu ka makume nharhu wa malembe, u kumile ku vona ka yena, naswona a ri karhi a rhendzeleka na doroba hi siku rero, a ri karhi a nyika vumbhoni. Ndhundhuma ya khale ya swiambalo, yi tshamile kumbexani ku ringana makume nharhu, makume mune wa majorata, ku ya ehenhla kukotisa *sweswo*, ntseña swinchalani swa khale. A ku ri kumbexani na makume mune, makume ntlanhu wa magidi ya vanhu kwalahaya. Kutani swihuku swa khale na swinchalani, leswi a swi ri swa vona, ndzi pfumela leswaku a va ta fanela ku teka xiboho exikarhi ka vona. Nakona mpfula a yi ri karhi yi na.

¹⁴² Kutani va ndzi enhliserile ehansi hi ntambhu, hi le henhla ka khumbi, ivi ndzi fika eka platifomo. Muminstara... Wanuna loyi a tshameke lahawani, va n'wi tisile... Yena na n'wana wa yena wa xisati va tile ku suka eMichigan eka timinetse tintsongo leti nga hundza, va vulavula hi Makwerhu Arment. Ha n'wi

tsundzuka lahwani. U le switarateni swa le Vukwetsimelweni vusiku lebyi. Makwerhu Arment a ri kwalahaya, nakona u hluvurile jasi ra yena, ivi a yima empfuleni, kutani a ri nyiketa Makwerhu Jack Moore ku va a ri ambala, hikuva Jack a ri karhi a rhurhumela. Loyi wa le Dzongeni a lava ku oma empfuleni liya ya xirhami le Mexico. Kutani hi luya a yimile kwalahaya.

¹⁴³ Kutani Billy Paul u tile eka mina, jaha ra mina, kutani a ku, “Papa, u ta fanelu ku endla swin’wana. Ku na wansati lontsongo wa Mumexico ehansi lahaya a nga na n’wana loyi a nga fa mixo lowu. A ndzi na tiaxara to ringanelu ku n’wi humesa elayinini.” Loko ku tlhandleka mavoko ehenhla ka wanuna luya wa bofu swi n’wi nyikile ku vona ka yena, ku tlhandleka mavoko ehenhla ka n’wana wa yena loyi a nga fa a swi ta n’wi nyika vutomi bya yena. Wansati a ri Mukhatholiki. Nakona, yena, a va nga swi koti ku n’wi tlherisela endzhaku.

Kutani Makwerhu Espinoza na van’wana a va n’wi byerile leswaku, “A ha ha ri na makhadi ya xikhongelo. U ta fanelu ku yimela vusiku byin’wana.”

¹⁴⁴ Wansati a ku, “N’wana wa mina u file. U file hi mpfhuka ka mixo lowu. Ndzi fanele ku fika kwalahaya.” Nakona a ri ekuteni, khadi ra xikhongelo kumbe ee. Kutani va yimisile kwalomu ka madzana nharhu wa tiaxara kwalahaya. Kutani a ta hundza hi le hansi ka milenge ya vona, na ku tlulela ehenhla ka minhlana ya vona, ivi a tsutsuma na n’wana loyi wo fa, kutani a wela exikarhi ka vona. A swi nga endli ku hambana eka yena; yena a ringeta ku fika kwalahaya. A haganekile. Xikwembu a xi vulavurile na mbilu ya yena, lesswaku, “Xikwembu lexi nga nyikaka ku vona, xi nga ha nyika vutomi.” Oho, mina! A haganekile. Swin’wana a swi ri karhi swi pfurha endzeni ka yena.

¹⁴⁵ Oho, n’wina vavabyi, loko mi nga pfumelela sweswo swi pfurha endzeni ka n’wina xinkadyananyana, ivi mi languta leswi nga ta humelela, muxaka wolowo wa ku haganeka. Xikwembu lexi nga kota ku horisa xifanyetana lexi eka vusiku byin’wana, xi nga kota ku horisa manana loyi a ri na mfukuzani, xi horisa wanuna loyi, na ku endla leswi, Manana Florence Nightingale, oho, khume xa magidi! Xona, byebyo, vumbhoni lebyi nga hluriwiki; ku pfuxa vafi, na ku horisa vavabyi, na hinkwaswo leswin’wana. Loko Xi ri Xikwembu, lexi nga endlaka sweswo; hi Xona Xikwembu matolo, hi Xona Xikwembu namuntha. Vanani na ku haganeka, kutani mi ta kuma swin’wana swi endleka.

¹⁴⁶ Kutani, eka ku haganeka kwaloko, wansati u yile emahlweni a tsutsuma. Ndzi byerile Makwerhu Jack Moore, ndzi ku, “A nga ndzi tivi. A nga se tshama a ndzi vona. A nga swi tivi leswaku i mani loyi a nga ehenhla ka platifomo lahwani. Wansati lontsongo luya wa Mukhatholiki, sweswi, a nga swi koti ku vulavula rito ra Xinghezi, swingaleswi xana u swi tivisa ku yini leswaku i mani?” Ndzi ku, “Yana ehansi, u ya khongeleta n’wana, kutani sweswo swi ta n’wi eneta, kutani u ta tifambela.” Yena

a ku, “Kutani a swi nga vangi . . .” Ntsena a kova ku huwelela loku yaka emahlweni ehansi lahaya. A ta tlulela ehenhla, nakona munhu un’wana na un’wana a va a ri karhi a huwelela. A ta tsutsumela ehenhla ka makatla ya vona, ivi a wela ehansi hi le xikarhi ka vona. A ta fikelela magoza mangari-mangani, kutani a va ta ringeta ku n’wi tlherisela ehandle; naswona a ta tlhela a vuya hi le xikarhi ka milenge ya vona, a khomelerile n’wana loyi, a ri karhi a hlundzukisa tiaxara na hinkwaswo leswin’wana. A swi endlanga ku hambana na kun’we, a ri karhi a ya kwalahaya. A fanele ku fika kwalahaya! A swi nga endlili ku hambana leswaku a ku ri yini, a ta fika kwalahaya. Hi endlile leswaku muminstara . . .

¹⁴⁷ Sweswi xana xexo a hi xitori lexi fanaka na wansati wa Shunem-ke? Ntsena, sweswo a ku nga ri makume nharhunthalhanu wa malembe lawa ya nga hundza. Sweswo swi vile kwalomu ka nharhu wa malembe lawa ya nga hundza, kumbe mune. Wa vona?

Swi nga va nchumu lowu fanaka na vusiku lebyi. Loko ku haganeka loku fanaka ku pfuka, ku ta hoxa rirhandzu na ripfumelo ehenhla le mahlweni ka nyimpi, ku koxa leswi mi swi lavaka, hikuva i xitshembhiso xa Xikwembu leswaku mi nga va na swona. Sweswo hakunene swi lulamile.

¹⁴⁸ Ndzi hundzulukile; mina, muminstara, kumbe muevhangeli eka ndhawu yaleyo. Ndzi hundzulukile. Ndzi twerile wansati vusiwana, kambe ku hava ku haganeka. Wa vona? Ndzi hundzulukile ivi ndzi ehleketa, “Kunene, Makwerhu Jack u ta n’wi khongeleta, kutani sweswo—sweswo swi ta swi tshamisekisa.” Ndzi hundzulukile. Ndzi ku, “Tani hilaha a ndzi ri karhi ndzi vulavula sweswi, ripfumelo . . .”

Kutani ndzi langutisile ehandle lahaya, nakona a ku ri na xivono. Ndzi vonile xihlangi xi tshamile lahaya, xa xikandza lexintsongo xa ntima, xihlangi xa Mumexico xi nga ri na matino. A xi ri karhi xi ndzi hleka, xi tshamile ehandle lahaya. Ndzi ku, “Yimaninyana. Yimaninyana.” Ku haganeka ka yena ku endlile Moya lowo Kwetsima wu cinca dyondzo ya mina, wu cinca matihlo ya mina na ku ndzi kombeta n’wana wa yena a tshamile kwalahaya. Sweswo swi tlherisele Moya endzhaku. Ndzi te, “Yimaninyana. Yimaninyana. Ndzi tiseleni n’wana.”

Hi loko wansati a ta na lontsongo, wo tsakama, wo tswonga, nkumba wa wasi na ko basa, lexintsongo, xivumbeko lexi nga fa xo lehisa *xisweswo*. Wansati a wela ehansi, a ri na xihambano evokweni ra yena, kumbe vuhlalu bya xikhongelo, ku ta vula leswaku “leswaku ha losa Mariya.” Ndzi n’wi byela leswaku, “Xi tlakuse, sweswo a swi fanelanga.”

Kutani u tile ekusuhi na laha a ndzi ri kona, ivi a huwelela na ku kalakala, “Padre,” leswi vulaka, “Fada.”

Ndzi ku, "U nga vuli sweswo. U nga vuli sweswo. Xana wa pfumela?" Kutani a n'wi byela swona hi Spanish, loko a pfumela.

"Ina," a pfumela. U n'wi vutisile leswaku a pfumela hikokwalaho ka yini. Wansati a ku, "Loko Xikwembu xi kota ku nyika mukhalabya luya ku vona ka yena, xi nga swi kota ku nyika n'wana wa mina vutomi." Amen. Ku haganeka ku n'wi yisile eka swona. A ku nga ri na nchumu hi tlhelio ra mina; ntsena ndzi lo vona xivono.

Ndzi ku, "Hosi Yesu, ndzi vonile xivono xa xihlangi, ku nga ha va ku ri lexi."

Hi nkarhi wolowo xi sungurile ku raha-raha milenge ya xona, xi ku, "N'hwe! N'hwe! N'hwe!"

Ndzi ku, "Landzani wansati ku ya eka dokodela. Kumani xitativende lexi nga tsariwa eka dokodela xa leswaku, 'N'wana yaloye u file.'" Nakona xi . . . dokodela u tsarile xitativende, "Ku hefemula ka n'wana yaloye, mbilu yi yimile mixo lowu, ehofisini ya mina hi awara ya nkaye, u dlayiwile hi nyumoniya ha kambirhi." Oho, n'wana u le ku hanyeni eMexico vusiku lebyi, hilaha ndzi tivaka hakona. Hikokwalaho ka yini? Ku haganeka ku nghenile embilwini ya manana lontsongo, loyi a rilela n'wana wa yena, loyi a nga vona Xikwembu xi endla . . . xi horisile bofu ra wanuna, nakona a swi tiva leswaku Xi nga pfuxa n'wana loyi a nga fa.

¹⁴⁹ Ku haganeka! "Loko mi Ndzi lava hi timbilu ta n'wina hinkwato, kutani Ndzi ta mi yingisa." Wa vona?

¹⁵⁰ Mfumo! "Nawu na vaprofeta a swi ri kona ku ko ku fika Yohana. Hi mpfhuka ka nkarhi wolowo, Mfumo wa Matilo wa chumayeriwa, nakona munhu u tikarhatela Wona." A mo yima ntsena ivi mi ku, "Ndzi tlakuli hi kholoro, Hosi, ndzi susumeteli endzeni." Mi tikarhetela Wona. Mi khomiwa hi ku haganeka, exikarhi ka Vutomi na rifu.

¹⁵¹ Ndzi navela ingaku a ndzi ri na nkarhi wa xitori xin'wana, lexi a ndzi ri karhi ndzi ehleketa hi xona sweswi, xa wansati, nhwenyana, loyi a nga teka ndlela yo hoxeka, na hilaha a nga pfula mapapila mantshwa na swin'wana, kukondza ndzi ku, "Sesi . . ."

U tlakukile kutani a ku, "Ndzi—ndzi pfumela leswaku ndzi ta va kahle."

Ndzi ku, "Ee, ee! Tshima kwalano."

Kutani, nchumu wo rhanga lowu mi wu tivaka, u sungurile ku khongela swintsongo, kutani xikan'we-kan'we a sungula ku tlakusa rito na ku tlakusa rito. Endzhaku ka nkarhi u khomiwile hi ku haganeka, a ku, "O Xikwembu, ndzi ponise!"

¹⁵² Vaxihoko xa Xikala-vito a va nga ta xi tshungula. A ku nga ri na swin'wana leswi a swi ta xi tshungula. Kambe lamakulu,

matihlo ya ntima ya ndzi langutile, nakona mihloti a yi ri karhi yi khulukela emarhameni ya yena; a ku, "Swin'wana swi humelerile." Oho, ina! Ina, nkulukumba! Swin'wana swi humelerile. U khomiwile hi ku haganeka.

¹⁵³ A hi veni na ku haganeka hi mayelana na leswi; exikarhi ka rifu na Vutomi.

¹⁵⁴ Loko mi nga haganeki, mi nga kali mi ta lahawani. Loko mi haganekile, tanani lahawani mi ta hlalela, mi—mi ta swi kuma ntsena loko mi fika kwalahawani.

¹⁵⁵ A hi khongeleni. Hi ku haganeka mi langutisa Mfumo wa Xikwembu, Wu ta ta ehenhla ka n'wina.

¹⁵⁶ Tata wa hina loyi a nga Matilweni, ndza Ku khongela hi Vito ra Yesu, hi tsetseleli, Hosi. Nakona u sungula ku haganeka endzeni ka hina. O Hosi Xikwembu, hi tsetseleli, ndza khongela, pfumelela vanhu va Ku lava vusiku lebyi hi timbilu leti hagankeke. Ha swi tiva leswaku U kona kwala, Hosi. Wa ha ri yaluya wa tolo, namuntlha, na hilaha ku nga heriki.

¹⁵⁷ Kutani sweswi ingaku vanhu lava va nga na Mfungho, leswaku va nga va va hundzile eku feni ku ya eVuton'wini, va cincile ku suka evuton'wini bya khale bya swa misava ku ya eka byintshwa. Va swi endlile. Ngati yi totiwile; nakona, Xikwembu, va nyike xikombiso xa Mfungho. Ingaku va nga teka Mfungho wolowo emavokweni ya bona, lava va vabyaka, va ku, "Ndzi ximakiwa lexi xaviweke xa Xikwembu. Ndzi le ka Kreste, kutani eka Yena ku hava vuvabyi. Ndzi le ka Kreste, kutani eka Yena ku hava vudyoho. Ndzi le ka Kreste, kutani eka Yena ku hava kala ripfumelo. Ndzi landzula swilo hinkwaswo leswi javulosi a nga ndzi byela swona. Ndzi teka Mfungho wa mina leswaku swa mina... 'U tlhaviwile hikokwalaho ka swidyoho swa mina; U tshoviwile hikokwalaho ka ku homboloka ka mina; mimpfimbeti leyi yi ndzi nyikaka ku rhula a yi ri ehenhla ka Yena; kutani ndzi tshunguriwile hi timbunga ta Yena.' Kutani sweswi ndzi khoma Mfungho, wa leswaku Xikwembu xi ndzi lemukile, xikongomelo xexo, Munhu, loyi a xaviweke hi Ngati ya Hosi Yesu. Kutani ndzi khomile Mfungho wa rifu ra Yena emavokweni ya mina, hikuva U pfukile nakambe, nakona Yena i wa mina naswona mina ndzi wa Yena. Ndzi famba hi ripfumelo ro tiyimisela, leswaku ku sukela vusiku lebyi ku ya emahlweni, ndzi pfumela Xikwembu, nakona ndzi ta tshunguriwa loko ndzi fika kwalahaya na ku fikelela swilaveko."

Hikuva, Marito yo hetelela lawa ya weke ku suka enon'weni wa Yena, a ku ri lawa, "Loko va tlhandleka mavoko ehenhla ka vavabyi, va ta hlakarhela." Hi nyike swona, Hosi. Ingaku ku haganeka ku nga nghena, hikuva ndzi swi kombela hi Vito ra Yesu. Amen.

Ndzi nga swi kota, ndzi ta swi kota, ndza pfumela;

Ndzi nga swi kota, ndzi ta swi kota, ndza pfumela;

Ndzi nga swi kota, ndzi ta swi kota, ndza pfumela

Leswaku Yesu wa ndzi horisa sweswi.

Oho, ndzi nga swi kota, ndzi ta swi kota, ndza pfumela;

Ndzi nga swi kota, ndzi ta swi kota, ndza pfumela;

Ntsena ehleketani, “Ndzi tiyimiserile!”

Ndzi nga swi kota, ndzi ta swi kota, ndza pfumela

Leswaku Yesu wa ndzi horisa sweswi.

¹⁵⁸ Ma swi pfumela sweswo? [Nhlengeletano yi ku, “Amen.”—Muhleri.] “Ndzi tiyimiserile! Ndzi tiyimiserile, hi tintswalo ta Xikwembu, leswaku ndzi nga ka ndzi nga yimi kukondza Nchumu wolowo wo karhi wu ndzi ba. Nakona ndzi ya kwale henhla ku ya tlhandlekiwa mavoko.”

Sweswi, Xikwembu a xi se tshama xi hi tsandzekisa. Nakona ndzi pfumela leswaku Mutshunguri lonkulu sweswi u le kusuhi. Ndzi pfumela Xikwembu lexi xi nga tsala Rito, ndzi pfumela Xikwembu lexi xi nga endla gandzelo, ndzi pfumela Mfungho wa Xikwembu lowu wu hi basisaka ku suka evudyohweni vusiku lebyi, Mfungho, Vutomi bya Xona N’winyi, byi kona kwala na hina. “Ndzi ta va na n’wina, hambi ku ri ku fika emakumu ka misava. Ku nga ri ku ngani nakona misava a yi nga ha Ndzi voni, hambiswiritano n’wina mi ta Ndzi vona, hikuva Ndzi ta va na n’wina, hambi ku ri ku va endzeni ka n’wina, ku ya fika emakumu ka misava.” Ma swi pfumela sweswo? [Nhlengeletano yi ku, “Amen.”—Muhleri.] Ndzi tshembhela eka Xona. Ndzi pfumela leswaku Xi ta swi endla. Xana a mi swi pfumeli? [“Amen.”]

¹⁵⁹ Sweswi, xikanwe-kan’nwe loko ndzi sungula sweswo, ndzi vona swivono swi ri karhi swi humelela, amen, swivono swikulukumba swa Hosi, leswi vulavulaka swilo leswikulu. Amen! Loko ndzi nga sungula sweswo, hi ta va kwala vusiku hinkwabyo. Mi ya eku swi pfumeleni? Xana ma pfumela? Amen! Ndzi swi pfumela hi mbilu ya mina hinkwayo.

¹⁶⁰ Wansati lontsongo loyi a nga tshama lahaya kusuhi na Makwerhu Palmer, i muluveri eka mina. U huma eGeorgia, nakona u xanisiwa hi xilumi. Loko a nga pfumela leswaku Xikwembu xi ta n’wi horisa, Xi ta swi endla. A ndzi se tshama ndzi n’wi vona wansati loyi evuton’wini bya mina, kambe xexo hi xona xiphijo xa yena.

¹⁶¹ Wansati luya lontsongo, a ndzi swi tivi loko ku ri leswaku u tshama a twa Hungu, kumbe ee, kambe loko ndza ha ri eku chumayeleni lahwani, ndzi n'wi vonile. Wo swi pfumela ntsena ivi u vona loko sweswo swi lulamile. Amen. Loko ntsena wo swi pfumela! Hi swona sweswo.

¹⁶² Wansati loyi a nga tshama endzhaku lahwani na xiphiko xa nhlana, u le ku xanisekeni swinene, vito ra yena i Manana Wisdom. Loko u nga pfumela hi mbilu ya wena hinkwayo, Yesu Kreste u ta ku horisa. A ndzi se tshama ndzi n'wi vona wansati loyi evuton'wini bya mina, kambe u tshamile lahay, a ri karhi a xaniseka. U ambele rhoko ya xitshopani. Hi swona sweswo? Swi lulamile. Xana hi valuveri eka un'wana? Ina. Swi lulamile, nkulukumba. Famba ekaya, u ya hola. Yesu Kreste wa ku horisa. Amen.

¹⁶³ Wansati un'wana loyi a nga khomiwa hi sweswo, xiphiko xa nhlana, u tshamile lahwani. U na xiphiko xa nhlana. U na mufana, nakona u na xiphiko xa nhloko. Ahaa. Hi swona sweswo. Manana Parker i vito ra yena. Mi va lava va pfumelaka hi timbilu ta n'wina hinkwato, kutani Yesu Kreste u ta mi horisa ha vumbirhi bya n'wina. Amen! Mi valuveri eka mina. Sweswo hi swona hakunene. Amen! Pfumelani hi timbilu ta n'wina hinkwato.

¹⁶⁴ Hi loyi mukhalabya a nga tshama endzhaku lahwani ku suka eMichigan. U na xiphiko etindleveni ta yena. Oho, u anakanya marito, xiphiko xa ximoya. Hi swona sweswo? U le ku pfumeleni leswaku—leswaku... A wu swi tivi loko ku ri leswaku i Xikwembu, kumbe i yini leswi swi vulavulaka na wena. U twa huwa etindleveni ta wena. Ndzi muluveri hi ku hetiseka eka wena. Loko sweswo swi ri swona, yimisa mavoko ya wena, nakona sweswo hileswi humevelaka. Swi nga ka swi nga ha ku karhati nakambe, Yesu Kreste wa ku horisa.

Xana ma yi pfumela Nángá leyikulu? [Nhlengelatano yi tlangela na ku vula leswaku, “Amen.”—Muhler.]

¹⁶⁵ A ndzi ta vulavula na wena, kambe, ku suka eNorway, nakona a wu swi twisisi; ririmbi ra Xinorway. Ahaa. Swi lulamile, n'wi byeli a ya ekaya, a ri karhi a pfumela, sesi, loko u tiva ku xi vulavula. N'wi byeli leswaku xiphiko xa yena xa nhloko xi ta n'wi sukela. Sweswi, wa swi tiva leswaku a ndzi n'wi tivi. U tile lahwani ku suka eNorway, ku va a ta khongeleriwa. Tlhelela ekaya, u ri wanuna loyi a nga hola. Amen.

¹⁶⁶ Oho! “Yesu Kreste wa ha ri yaluya wa tolo, namuntlha, na hilaha ku nga heriki!” Xana i yini? I Langavi leriya ra Ndzilo. I Moya lowo Kwetsima. I Mfungho wolowo, leswaku Yesu Kreste wa hanya. Kutani loko vanhu, nkarhi lowu nga hundza, va N'wi vona a endla swilo leswiya, U vonisisile mianakanyo ya vona hikuva hi Yena Rito. “Kutani Rito ri karhiha ku tlula tlharhi

leri nga lotiwa hi matlhelo ha mambirhi, na muvonisisi wa mianakanyo na makungu ya timbilu ta vona.” Amen.

¹⁶⁷ Ndzi vonile mati ya ri karhi ya hatima, na nakulorhi lontsongo a ri karhi a ta. U yingisile, na ku hlaya buku kwalahaya, leyi a yi tsariwile, hi Xinorway. U vuye a twisisa; munhu un’wana u vulavurile na yena. U na xiphiko, kambe, loko ntsena a nga pfumela hi mbilu ya yena hinkwayo, Hosi Yesu u ta n’wi horisa. U tile hi ndlela leyo leha, naswona i n’wana wo pfumala, eka sweswo, a ri karhi a ringeta ku tisusumetela endzeni. Nakona hi ta n’wi tlhandleka mavoko, ku nga ri khale.

¹⁶⁸ Xana ma pfumela? [Nhlengeletano yi ku, “Amen.”—Muhler.] Amen! Ku saseka ka swona! Oho, mina! “Mutshunguri lonkulu sweswi u le kusuhi!” Sesi, xana u kwihiluya Sesi Ungren, na sesi loyi un’wana eka piyano? Ndzi mi lava leswaku mi ta hi xihatla, loko mi swi kota, kutani mi hi nyika risimu, “Mutshunguri luya lonkulu sweswi u le kusuhi, Yesu loyi a twelaka vusiwana.”

¹⁶⁹ Ndzi lava leswaku vanhu lava va nga ephacisini *lahawani*, lava va lavaka ku khongeleriwa, va rhelela hi tintswalo eka tlhelo leri *lahawani*, ntsena phacisi yin’we hi nkarhi. Makwerhu Neville, endla sweswo loko u ta swi kota. Xana u kwihilu Makwerhu Capps kumbe un’wana wa vasumi lavaya va tinsimu? Swi nga va njhani hi Makwerhu Ungren, kumbe Makwerhu Capps, kumbe un’wana, a nga ta haleno, a ta yimbela, a hi sumela risimu leri loko a ta swi kota. I Makwerhu...Xana u kwihilu un’wana wa vamakwerhu lavaya? Swi lulamile. Swi lulamile, nkulukumba, sweswo swi kahle. Swi lulamile. Un’wana na un’wana a khongele!

¹⁷⁰ Tsundzukani, ku haganeka! Ma swi vona leswi ku haganeka ku nga ta swi endla? Ku haganeka ku ta mi tsemakanyisa lwandle. Ku haganeka ku ta mi susa etikweni rin’wana. Ku haganeka ku ta mi yisa kun’wana na kun’wana. Mukhalabya wo hlawuleka na n’wana wa yena wa nhwenyana, hi ku haganeka, va ringetile ku nghena endzeni, ku nghena endzeni, leswin’wana hinkwaswo, kutani va tshama ehansi hambiswiritano; ku nga ri khale ngopfu Moya lowo Kwetsima wu tisile nchumu wa kona kwala nhlengeletanweni, ntsena loko ndzi nga se fika lahawani. Oho!

Risimu ra khisimus ro tsokombela leri nga se
tshamaka ri yimbeleriwa,
Yesu, Yesu wo kateka.

Nángá leyikulu sweswi yi le kusuhi,
Loyi a twelaka vusiwana...

Hosi Yesu, hi nyike, yingisa xikhongelo xa nandza wa Wena, Hosi. Ndza khongela leswaku U ta hlangana na un’wana na un’wana wa lava kutani u va horisa, hikokwalaho ka ku Kwetsima ka Wena, hi Vito ra Yesu.

...rito ra Yesu.

Noti yo tsokombela eka risimu ra seraf,
 Vito ro tsokombela eka ririmu ra loyi a faka,
 Oho, risimu ra khisimusi ro tsokombela leri
 nga se tshamaka ri yimbeleriwa.

Lava va nga haganeka sweswi, lava hakunene mi swi tivaka leswaku mi ya eku horisiweni... Ntsena ehleketa ni, ku ya hilaha ndzi tivaka hakona, dzana ra tiphesente ra lava a va ri, eka vusiku bya Sonto lowu nga hundza, va horile vhiki leri.

Loyi a twelaka vusiwana...

¹⁷¹ Vonani, Wa ta. Wa vona, U mi horisile khale. U tisa Rito ra Yena, Wa Ri tiyisisa, U kombisa Vukona bya Yena. Ku hava loyi a nga endlaka swilo sweswo ehandle ka Xikwembu. Ma swi tiva sweswo. I xikombiso xa Mesiya. Nakona ma swi tiva leswaku a hi mina Mesiya, swingaleswi hi Yena. Sweswi lahawani U khorwisile hinkwaswo eka n'wina.

Sweswi a swi fanele ku mi hoxa eka ku haganeka. A swi fanele ku lumeka ndhawu leyi na ku khumbha e... Ee, ntsena ku va tanahi e—e—e—e mencisi eka mbita ya mapa. Hakunene! Nakona a swi fanele ku bulusa ripfumelo, na—na rirhandzu na ku haganeka swi yisa vanhu eka Mfumo wa Xikwembu, ku pfumela hi timbilu ta vona hinkwato. Xana ma swi pfumela sweswi, un'wana na un'wana wa n'wina? [Nhlengeletano yi ku, "Amen."—Muhleri.] Swi lulamile. Sweswi, Billy, u kuma e...

¹⁷² Tony, ndzi langutise xinkadyananyana. A ndzi se ku vona ku ringana nkarhi wo leha, kambe wa vabya. U xaniseka hi swin'wana swo tanahi nchuluko. Hi swona sweswo. Swi ya eku yimeni. Swi ta ku sukela. Ndzi vonile nchumu wolowo wu ri karhi wu n'wi landzelela, loko a ri karhi a suka lahaya. Ku hava nchumu lowu nga fihleriwaka Xikwembu sweswi. A ndzi se tshama ndzi n'wi vona... A ndzi se n'wi vona Tony ku ringana tin'hweti to karhi, ndza tshembha, kambe ndza swi vona leswaku u na sweswo. A ri na swona; a nga ha ri na swona sweswi.

¹⁷³ A hi korhamiseni tinhloko ta hina. Ku nga vi na tihlo na rin'we leri nga pfuleka. Ku nga vi na tihlo na rin'we leri nga ta langutisa. Hinkwerhu a hi veni eku khongeleni. Kutani Billy Paul kumbe Makwerhu Neville, un'we, u ta vitana tilayini leti landzelaka loko ku fika nkarhi. Sweswi hinkwerhu a hi veni eku khongeleni. Hi ya eku ringeten i sweswi; phacisi ya le xikarhi yi ta ta evokweni ra wena ra ximatsi loko u ta vitaniwa, swingaleswi na e—e phacisi ya le vokweni ra ximatsi *lahawani* u ta ta evokweni ra wena ra ximatsi loko u ta vitaniwa. Makwerhu Neville u ta ku vitana.

Sweswi, a ndzi tivi loko ku ri na un'wana wa vamakwerhu lahawani loyi a nga tsakelaka ku yima laha a tlhandleka mavoko ehenhla ka vanhu lava loko va ri karhi va ta, na mina? Un'wana na un'wana va n'wina vaboti va tiministara, hakunene mi amukelekile ku ta mi ta yima na mina loko mi lava ku swi

endla. A hi nchumu lowu nga vekiwa etlhelo. Mi na timfanelo to khongelela vavabyi ku fana na mina.

Ndza swi tiva leswaku Moya lowo Kwetsima wu kona kwala. Mani na mani loyi a nga taka a nga swi pfumeli sweswo, ku na swin'wana leswi nga hoxeka hi yena.

¹⁷⁴ Swi lulamile, a hi pfumeleni sweswi hi timbilu ta hina hinkwato, leswaku Xikwembu xi ta hi nyika swilo leswi hi nga eku swi kombeleni. Vanani na ripfumelo sweswi. Mi nga kanakani.

Kutani hinkwenu khongelani, un'wana eka un'wana. Xana Bibebe yi te yini? "Hi byelana swihoxo swa hina un'wana eka un'wana; hi khongelana un'wana eka e . . ."

¹⁷⁵ Kutani n'wina lava nghanaka eka layini, xikan'we-kan'we loko mavoko lawa ya mi khumbha, mi humela ehandle mi titsakerile na ku dzunisa Xikwembu leswaku mi horisiwile.

Swi lulamile, un'wana na un'wana a vi eku khongeleni sweswi loko Makwerhu Capps a suma tinsimu.

Hosi Yesu, sweswi hi pfune. Ndza khongela, hi Vito ra Yesu Kreste, leswaku Moya lowo Kwetsima wu ta khumbha munhu un'wana na un'wana, nakona ingaku va nga horisiwa tanihi leswi hi landzelelaka swileriso swa Wena swa ku tlhandleka mavoko ehenhla ka vavabyi. U te, "Va ta hlakarhela." Ha swi pfumela, Tatana, hi Vito ra Yesu. Amen.

Swi lulamile, un'wana na un'wana a vi eku khongeleni sweswi tanihi leswi hi sungulaka ku khongelela. Wo rhanga, i xifanyetana lexi vabyaka ehenhla ka xitulu xa mavhilwa.

Hi tlhandleka mavoko ehenhla ka n'wana, hi Vito ra Yesu Kreste, leswaku a ta horisiwa.

Ina, nkulukumba.

Hi Vito ra Yesu Kreste...[Makwerhu Branham na tiministara va tlhandleka mavoko ehenhla ka lava nga elayinini ya xikhongelo ku ringana khume nhungu wa timinetse, kambe swikhongelo swa kona a swi twakali. Nhlengelatano yi khongela na ku yisa emahlweni yi yimbelela *Nángá Leyikulu*—Muhleri.]

Risimu ra khisimus ro tsokombela leri nga se
tshamaka ri yimbeleriwa,
Yesu, Yesu wo kateka.

¹⁷⁶ Mi va ngani n'wina mi pfumelaka leswaku Xikwembu xi swi endlile, mi na ku tiyisisa etimbilwini ta n'wina, hi xitiyisiso lexi lemeriweke, leswaku Xikwembu xi hlamurile xikombelo xa n'wina hikuva mi yingisile Rito ra Xona? Swi endlekile. Swi hetisekile. Swi—swi endlile. Xi pfumeleni hi timbilu ta n'wina hinkwato, leswaku i ntirho lowu hetisekeke.

¹⁷⁷ Sweswi vonani vhiki leri, kutani loko mi vuya nakambe, mi hlalela leswi nga humelela.

¹⁷⁸ Ndza tshembha, leswaku nkarhi lowu taka loko ndzi vuya, loko Hosi yi swi rhandza, ndzi ta va ndzi ri karhi ndzi fambisa layini ya xikhongelo eka yin'wana ya tikamara leti, eka xikamarana lexiya ndzi nga ta va yisa kona, ma swi vona. Ndzi pfumela leswaku yi le ku petsunelekeni sweswi, ma swi vona, awara.

¹⁷⁹ Ndzi lava ku fika laha ndzi nga ta tisa vanhu ha un'we-un'we, ndzi tirhana na vona ha un'we-un'we, kukondza ndzi swi lavisia na ku swi kuma, kutani ndzi ya emahlweni kukotisa sweswo, kukondza ndzi tshama na vona hi nkarhi wolowo.

¹⁸⁰ Xikwembu xi mi katekisa hinkwenu. Hi tsakile swinene ku va mi vile lahawani. Xana mi kumile...Xana ma tiyisela sweswi? Xana ma swi endla...Xana mi le ku haganekeni, ku haganeka ka n'wina loku a mi ri na kona hikokwalaho ka ku horisiwa ka n'wina? Xana swi nga va hinkwaswo swi herile sweswi, hi rirhandzu na ripfumelo na vutitsembhi bya leswaku Xikwembu xi ta endla leswi Xi nga tshembhisa ku swi endla? [Nhlengeletano yi ku, "Amen."—Muhleri.] Xikwembu xi ta swi endla.

Ku sukela eka vana lavantsongo, ku na vambirhi kumbe vanharhu va vona lahawani vusiku lebyi, eswitulwini swa mavhilwa, ndzi...Hi ta pfumela hikokwalaho ka vona, va ha ri vana, leswaku va ta horisiwa, na vona. Va ya eku holeni. Xana a mi swi pfumeli-ke? [Nhlengeletano yi ku, "Amen."—Muhleri.] Amen! "Va ta hlakarhela." Va fanele ku swi endla. Xikwembu xi vule tano. Nakona hi na ku haganeka, kutani hi ya eku swi pfumeleni sweswi, leswaku swi ta endliwa.

¹⁸¹ Sweswi, swikhongelo swa hina ntsena swi khumbhana na nchumu wun'wana endzhaku ka lowun'wana. Sweswi hi ya eku ntshuxeni ka vayingiseri eka lava va faneleke ku famba. Nakona hilaha ndzi kotaka ku vona hakona, hi kwalomu ka nhungu wa timinetse ku ya eka awara ya khume. Kutani, loko ku ri leswaku mi fanele ku famba, hi-hi tsakile ku va mi vile kona, naswona hi lava leswaku mi tlhela mi vuya mi ta va na hina. N'wina van'wana hinkwenu, endzhaku ka loko hi yimile, mi ta tlhela mi tshama nakambe; kutani lava va nga eku fambeni, fambani mi miyerile hilaha swi kotekaka hakona. Kutani hi ta va na xilalelo xikan'we-kan'we endzhaku ka sweswo. Ma rhambiwa ku va mi sala loko mi ta swi kota. Loko mi nga swi kota, Xikwembu xi mi katekisa. Mi ndzi khongerisa. Ndzi ta mi khongerisa. Nakona, tsundzukani, hlayisani Mfungho wu totiwile, mi tlhela mi haganekaza ku chivirikela ku ya eka Mfumo wa Xikwembu. Amen!

Sweswi hi ya eku yimbeleleni ka risimu ra hina ro ntshuxa, loko hi swi kota, kutani, *Tekani Vito Ra Yesu Mi Va Na Rona*, loko hi ri karhi hi yima.

. . . Vito ra Yesu mi va na rona,
 N'wana wa nhlomulo na khombo;
 Ri ta mi nyika ntsako na ku chavezeleka . . . (Mi
 nga va tisa sweswi.)
 . . . rona hinkwako laha mi yaka kona.

Vito ro hlawuleka, Vito ro hlawuleka! O
 hilaha ri tsokombelaka hakona, O hilaha ri
 tsokombelaka hakona!

Ntshembho wa misava na ntsako wa le Tilweni;
 Vito ro hlawuleka, O hilaha ri tsokombelaka
 hakona, hilaha ri tsokombelaka hakona!
 Ntshembho wa misava na ntsako wa le Tilweni.

Qhavulanani hi mavoko, mi ku, "Hosi yi ku katekisa, boti
 wa mina wa muluveri, sesi." Hi vuenti, hi ku tshembheka, hi
 xichavo, na vanghana va Makreste hi ku boha ka xinakulobye,
 qhavulanani hi mavoko, boti na sesi. Xikwembu xi mi katekisa
 hinkwenu, swin'we. Swi sasekile!

Ndza N'wi rhandza, ndza N'wi rhandza
 Hikuva U rhangile a ndzi rhandza
 Kutani a xava ku ponisiwa ka mina
 Emhandzini ya Xihambano.

Kukondza hi hlangana! kukondza hi
 hlangana!

Kukondza hi hlangana emilengeni ya Yesu;
 kukondza hi hlangana!

Kukondza hi hlangana! Oho, kukondza hi
 hlangana!

Xikwembu xi va na n'wina kukondza hi
 hlangana nakambe.

Kukondza hi hlangana! kukondza hi
 hlangana!

Kukondza hi hlangana emilengeni ya Yesu;
 kukondza hi hlangana!

Kukondza hi hlangana! kukondza hi
 hlangana!

Xikwembu xi va na n'wina kukondza hi
 hlangana nakambe.

[Makwerhu Branham a sungula ku hama *Xikwembu Xi Va Na N'wina*—Muhleri.]

¹⁸² Ku tsokombela loku ka xinakulobye xa Mfungho lowu kulukumba wa Xikwembu, Moya lowo Kwetsima, ingaku Wu nga tshama hi rifuwo na n'wina hinkwenu kukondza hi hlangana nakambe. Tintswalo ta Xikwembu a ti fambe na n'wina, ti ba tindlela ta rifu emahlweni ka n'wina; ku endla leswaku ndlela ya n'wina yi basa, leswaku mi ta ko ta ku vona Yesu nkarihi hinkwawo emahlweni ka swikandza swa n'wina, nakona mi nga ka mi nga tsekatsekisiwi.

¹⁸³ Tatana wa le Matilweni, hi nyikela xikhongelo lexi, na xikhongelo xa mixo lowu, swikhongelo leswiya na leswi nga endliwa, na ku kwetsima hinkwako eka Wena, hi Ku nyika ku khensa na ku dzuneka hikokwalaho ka ku ponisa vanhu, na ku horisa vanhu, na ku hi nyika tintswalo ta Wena leti kulukumba leti hinkwerhu hi langutelaka tona. Hi ponise. Hilaha hi Ku khensaka hakona eka leswi. Vana na hina sweswi kukondza hi hlangana nakambe. Hlangana na hina eka xilalelo. Vana ehenhla ka vhilwa ra lava va chayelaka, Hosi, ku ya emakaya ya vona. Va leteli ku hundza eka tiholideyi leti to karhata, leswaku ku nga vi na ku vaviseka na nghozi leswi nga ta ta eka vona. Hi Vito ra Yesu Kreste ha swi kombela. Amen.

Swi lulamile, *Tekani Vito Ra Yesu Mi Va na Rona*, nakambe.

Tekani...Vito ra Yesu...(Mi ntshuxekile
sweswi, hi Vito)...mi va na rona,
Tani hi xitlhangu eka swirimbanu hinkwaswo;
Loko miringo yi va ekusuhi na n'wina...

Xana u endla yini manuku?

Ntsena hefemula Vito rero ro kwetima hi
xikhongelo.

Vito ro hlawuleka, Vito ro hlawuleka! O
hilaha ri tsokombelaka hakona, O hilaha ri
tsokombelaka hakona!

Ntshembho wa misava na ntsako wa le Tilweni;
Vito ro hlawuleka, Vito ro hlawuleka! O
hilaha ri tsokombelaka hakona, hilaha ri
tsokombelaka hakona!

Ntshembho wa misava na ntsako wa le Tilweni.

Ku nkhisama eVitweni ra Yesu,
Ku badama emilengeni ya Yena,
Hosi ya tihosu eTilweni hi ta Yi ambexa harhi,
Loko rendzo ra hina ri helerile.

Vito ro hlawuleka, O hilaha ri tsokombelaka
hakona!

Ntshembho wa misava na ntsako wa le Tilweni;
Vito ro hlawuleka, O hilaha ri tsokombelaka
hakona, hilaha ri tsokombelaka hakona!

Ntshembho wa misava na ntsako wa le Tilweni.

¹⁸⁴ Sweswi ntsena loko mi nga se tshama ehansi, loko ntshungu
wu ri karhi wu miyeteka sweswi hikokwalaho ka ntirho wa
xilalelo.

Loko ndzi nga hoxisi, xana loyi a hi yena Makwerhu Blair,
muministara loyi ndzi nga hlangana na yena eArkansas ku
nga ri khale ngopfu? A ndzi ehleketa leswaku hi yena. A
ndzi nga ri na ntiyiso. A wu ri kona kwala eku katekisiwени
ka n'wana, lontsongo, mixo lowu. A ndzi ehleketa...Xana a

ndzi hlangananga na wena ku nga ri khale ngopfu, kwala eHot Springs, Arkansas? Eka wena a ku ri na...Swin'wana a swi lava ku humelela, kutani Moya lowo Kwetsima wu swi huwelerile. Xana hi swona sweswo? Swi kahle. Ntsena ndzi... Ndzi lo ehleketa swa le ndzhaku, a ndzi ehleketa leswaku, "Hi yena makwerhu luya." Ndzi tsakile swinene ku va u ri kona, Makwerhu Blair.

¹⁸⁵ Sweswi ndzi ta kombela Makwerhu Blair loko a nga khongeleta ku va Xikwembu xi hi basisela xilalelo sweswi lexi xi lavaka ku humelela. U nga swi kota, Makwerhu Blair? [Makwerhu Richard Blair a khongela—Muhleri.] Ina. Ina, Hosi. Hi nyike swona, Hosi. Ina, Hosi. Ina, Hosi. Ina, Hosi. Ina. Amen.

Mi nga tshama ehansi sweswi, un'wana na un'wana.

¹⁸⁶ Kutani sweswi eka ogene, sesi, loko ntsena u nga tlanga *Ku na Xihlovo Lexi Tatiweke Hi Ngati*. Nakona mi nga ha sungula ya n'wina... swi yiseni lahaya, swihi na swihi leswi nga fanela. Swi lulamile, ku hlaya sweswi, loko ntsena hi ngava... miyelanyana xinkadyana.

Ina, sesi? [Sesi a ku, "Ndzi nga kuma xidunkwana xa mina?"—Muhleri.] Swi lulamile, sesi, langutisa kona kwala kukondza u xi kuma, sweswo swi ta va swi lulamile, swihi na swihi leswi nga kona kwalano. Hi xona xexo? Swi lulamile, sesi.

¹⁸⁷ Swi lulamile, sweswi Makwerhu Neville u ta hlaya ntshamisekiso wa xilalelo.

Kutani tiaxara ti ta va ti ri karhi ti ta, loko ku ri na valuveri lahwani, eka xitulu xin'wana na xin'wana, na ku tisa eka phacisi hi phacisi, loko hi ri karhi hi ta, na layini hi layini, eka xilalelo.

¹⁸⁸ Kutani sweswi anakanyani hi vuenti sweswi. Tsundzukani, Israel ri xi dyile hi ku haganeka, kutani kwale rendzweni a ku nga ri na un'we loyi a tsaneke exikarhi ka vona, emakumu ka makume mune wa malembe. Loku i ku horisa ka Vukwembu, nakona.

Hosi yi ku katekisa, Makwerhu Neville. [Makwerhu Neville a hlaya Matsalwa lawa ya landzelaka, Vakorinto vo Rhanga 11:23-32—Muhleri.]

[*Hikuva na mina ndzi amukerile eka Hosi leswi ndzi mi byeleke swona, Leswaku Hosi Yesu hi vusiku lebyi a xengiweke ha byona u tekile xinkwa:*]

[*Kuteloko a nkhensile, a phema, a ku, Tekani, mi dya: lowu i miri wa nga, lowu phemeriveke n'wina: endlisani sweswo mi ndzi anakanya ha swona.*]

[*Hi mukhuva wolowo a teka xinwelo, loko a ta va a lalerile, a ku, Xinwelo lexi i ntwanano lowuntshwa engatini ya mina: endlisani sweswo, hi masiku*

hinkwawo loko mi nwela eka xona, mi ndzi anakanya ha swona.]

[*Hikuva hi masiku hinkwawo loko mi dya xinkwa lexi, ni loko mi nwela xinweleni lexi, mi ta va mi vula rifu ra Hosi kukondza yi fika.]*

[*Hikokwalaho-ke mani na mani loyi a dyaka xinkwa lexi, na ku nwela exinweleni lexi xa Hosi, hi mukhuva lowu nga faneriki, u ta va ni nandzu wa miri ni wa ngati ya Hosi.*]

[*Kambe munhu un'wana na un'wana a tikambele hakona, ku va kona a nga ta dya xinkwa xexo, a nwela exinweleni xexo.*]

[*Hikuva loyi a dyaka ni loyi a nwaka hi mukhuva lowu nga faneriki, wa dya ni ku nwa ku avanyisiwa ka yena, hikuva a nga tsundzukangi miri wa Hosi.*]

[*Hikokwalaho ku nga ni lavo tala lava tsaneke ni lava vabyaka exikarhi ka n'wina, nakona vo tala va file.*]

[*Hikuva loko ngi hi tiavanyisa, a hi nga ta avanyisiwa.*]

[*Kambe loko hi avanyisiwa, hi layiwa hi Hosi, leswaku hi nga tshuki hi biwa kun'we ni misava.*]

[Makwerhu Neville a ku, “Hosi a yi katekisi ku hlayiwa, ka Rito.” Makwerhu Branham kutani a tlakula thirenii ya xinkwa lexi nga phemiwa—Muhleri.]

¹⁸⁹ Ndzi khomile xinkwa xo ke comela, xi khonyanile na ku phemiwa, xi yimela miri wa Yesu Kreste; ha—ha xifunengeto lexi handzuriweke hi na ku fikelela Vukwetsimelo bya vukwetsimisisi.

¹⁹⁰ Tatana wa hina wa le Matilweni, xinkwa lexi xi lulamiseriwe ku yimela miri luwa wu nga tshoviwa na ku handzuriwa. Ingaku un'wana na un'wana wa hina, tanahi leswi hi xi amukelaka, a xive tanahi loko hi endlile swendlo leswi hi xidzi. Kutani ingaku hi nga va na ku rivaleriwa ka swidyo swa hina, na ku fikelela eka Vukwetsimelo bya vukwetsimisisi, ku hanya eVukoneni bya Wena eka vutomi bya hina bya yumundzuku; na hinkwawo masiku lawa hi nga ta ya hanya kwala misaveni, kutani hi va na Wena hilaha ku nga Heriki. Hi nyike swona, Tatana. Katekisa xinkwa lexi hikokwalaho ka xikongomelo lexi kungahatiweke. Hi Vito ra Yesu. Amen.

¹⁹¹ [Makwerhu Branham a tlakula thirenii ya swinghilazani leswi tatiweke hi wayeni—Muhleri.] Bibele yi te, “Endzhaku ka loko A tekile na ku phema xinkwa, hi mukhuva wolowo A teka xinwelo; kuteloko A lalerile, a ku, ‘Lexi i xinwelo xa Ntwanano Lowutshwa eNgatini ya Mina, leyi nga halatiwa hikokwalaho ka n'wina.’” Ingaku Hosi yi nga hi nyika minkateko ya Yona ehenhleni ka leswi loko ha ha khongela.

¹⁹² Hosi Yesu, ndzi khomile ngati ya vhinya, juzi leyi humaka emadiriveni. Nakona, Tatana, i swo yimela Ngati liya yo hlawuleka leyi yi hi basisaka, leyi Kwalahaya ku nga huma Mfungho. Ndza Ku khensa hikokwalaho ka Yona, Tatana, na hikokwalaho ka xikombiso lexi. U te, “Loyi a dyaka na ku nwa Leswi u na Vutomi lebyi nga heriki, nakona Ndzi ta n’wi pfuxa nakambe hi nkarhi wa makumu.” Ha Ku khensa hikokwalaho ka xitshembhiso lexi. Kutani, Tatana, ha khongela leswaku U basisa timbilu ta hina, kun’we, leswaku hi ta va lava lulameleke hi ku... ripfumelo ra hina; hi ri karhi hi swi tiva leswaku eka hina vinyi a hi lulamelanga, kambe ripfumelo ra hina ri nga ka ri nga tsandzeki, leswaku hi le ku amukeleni hi ku hetiseka e Ngati ya Yesu Kreste. Hi nyike swona, Tatana.

¹⁹³ Kutani kwetsimisa wayeni eka xikongomelo lexi yi nga kungaheteriwa xona. Leswaku mani na mani loyi a nwaka wayeni leyi vusiku lebyi, na ku teka xinkwa lexi, a va na ntamu eka rendzo leri ri yimeke emahlweni. Hi nyike swona, Hosi. Ingaku va nga hanya emimirini na ku tiya, na ku tatiwa hi Moya wa Wena, kukondza Yesu a vuya. Amen. [Xivati lexi nga riki na nchumu eka thepi—Muhleri.]

¹⁹⁴ Ndzi pfumela leswaku Xilalelo hi xin’wana xa nkoka lowukulu, xo kwetsima, vugandzeri byo tsokombela lebyi nga kona exikhongelweni xa kereke. A ku ri na swilo swimbirhi leswi a hi siyeriwe swona, swilo swinharhu, swo swi endla, leswi—leswi nga mintshamiseko na swiletelo. Swingaleswi vanhu vo tala va ringeta ku vula leswaku, “Hi na xipikiri xa xiviri.” “Hi na xiphemu xa xihambano.” Kambe a ku ri na swilo swinharhu leswi a swi sele: Xilalelo xa Hosi, Nkhuvulo, ku hlambisana ka Milenge, a ku ri swileriso swinharhu leswi a swi siyeriwe kereke.

¹⁹⁵ Kutani eka mina, vusiku lebyi a byi tikomba byi ri nkarhi wo hlawuleka swinene eka mina. Loko ndzi yimile lahawani na ku langutisa; hi ntolovelu ndzi—ndzi tshamela ku va eku khongeleni. Kambe vusiku lebyi, ndzi langutile mindyangu yo hambana-hambana, ku vona yin’wana ya mindyangu leyi a yi ta lahawani ku sukela loko ndza ha ri muchumayeri wa jaha, yi yimile kwala na le hansi laha a ku ri na mapa ya saha, kutani ndzi... van’wana va vona i vantshwa. Kambe ku hlalela vavanuna va ta ni vavasati va vona lavantsongo na mindyangu, na ku vona hilaha va tsakelanaka hakona, na ku kwetsima ka sweswo, hilaha va langutelaka vana va vona; ku vona manana lontsongo na mavoko ya yena ya fikelela, na ku ehleketa leswaku, “Xivokwana lexiya xi hlambiwile, nakona xi surile mihloti ematihlweni ya n’wana.”

¹⁹⁶ Kutani ndzi vonile mindyangu yi ta leyi ndzi nga tshama ndzi va emakaya ya vona loko va ri karhi va vabya, na ku hisa ka miri, vana; Hosi Yesu u horisile vana va vona. Ndzi va vonile loko va ri na swiphiqo swa mindyangu, Hosi yi ndzi pfunile ku swi olovissa; hi va vona va tsakile nakambe. Nakona ndzi ehleketa hilaha

swi nga ta va hakona loko hi ya eka Nkhuvo wa Vukati lowu kulukumba. Ndzi khensa swinene ku va Hosi yi ndzi pfumelerile ku va munghana eka n'wina na ku mi pfuna. Ndzi...sweswo hileswi ndzi nga kona hikokwalaho ka swona.

¹⁹⁷ Kutani ndzi, ntsena eheleketani leswaku i nkarhi wo lehisu ku yini, i malembe ma ngani; leswi hi kwalomu ka, ndzi sungurile ku chumayela, kwalomu ka 1930, kutani leswi hi kwalomu ka makume nharhu-mbirhi wa malembe eka mina, sweswi, makume nharhu-nharhu wa malembe, ndzi ri karhi ndzi chumayela. Kutani, hinkwako ku kayakaya na mindzingo na, swi languteka tano, hambiswiritano, loko-loko hi ta lahawani, hinkwaswo swi—swi rivariwile. Wa vona? Ntsena mi—mi tikomba tanihi loko ku ri na swin'wana hi mayelana na Xilalelo ntsena swi humesa hinkwako—hinkwako ku soholoka ka swilo, ku teka Xilalelo. Hosi yi mi katekisa.

¹⁹⁸ Nkulukumba sweswi u ya, eku hlayersi ka Matsalwa ya ntirho wa ku hlambisana milenge.

¹⁹⁹ [Makwerhu Neville a hlayersi Yohana 13:2-17, ivi a pfala ntirho—Muhleri.]

[*Kuteloko xilalelo xi herile, javulosi a rhangile a nghanisa embilwini ya Yudas Iskariota, n'wana Simon, eku navela ku n'wi xenga;*]

[*Yesu hi ku tiva leswaku Tata wa yena u vekile hinkwaswo emavokweni ya yena, na leswaku u humile eka Xikwembu, kutani u ya eka Xikwembu;*]

[*A suka a yima xilalelweni, a ntshuxa nguvu ya yena; a teka thawula, a titsimba ha rona.*]

[*Kutani a chela mati enkambanini, a sungula ku hlambisa milenge ya vadyondzisiwa, a sula hi thawula leri a titsimbeke ha rona.*]

[*Hi loko a ta eka Simon Petro: kutani Petro a ku ka yena, Hosi, xana wena u ta ndzi hlambisa milenge-ke?*]

[*Yesu a hlamula a ku ka yena, Leswi Ndzi swi endlaka a wu swi tivi sweswi; kambe u ta swi tiva endzhaku.*]

[*Petro a ku ka yena, U nga ka u nga ndzi hlambisi milenge ni siku rin'we. Yesu a n'wi hlamula, Loko Ndzi nga ku hlambisi, a wu na mhaka na mina.*]

[*Simon Petro a ku ka yena, Hosi, ku nga vi milenge ntsena, kambe na wona mavoko na nhloko.*]

[*Yesu a ku ka yena, La nhlambisiweke a nga lavi ku hlambisiwa loko yi nga ri milenge ntsena, kutani u ta basa hinkwako: loko mi ri n'wina mi basile, kambe a hi hinkwenu.*]

[*Hikuva a tiva la nga ta n'wi xenga; hikwalaho a nga te, A mi basanga hinkwenu.*]

[Kuteloko a hetile ku hlambisa milenge ya vona, a tekile na nguvu ya yena, a tlhela a tshama ehansi, a ku ka vona, Xana ma swi tiva leswi Ndzi mi endleke swonake?]

[Mi ndzi vula N'wini ni Hosi: swona ma vurisa; hikuva Ndzi yena.]

[Kutani loko Mina, ndzi nga Hosi ni N'wini wa n'wina, ndzi mi hlambisile milenge; na n'wina mi fanele ku hlambisana milenge.]

[Hikuva Ndzi mi vekele xikombiso, leswaku mi endla kukotisa leswi Ndzi mi endleke swona.]

[Ndzi vurisile, ndzi vurisile, Ndzi ri ka n'wina, Nandza a hi nkulu eka hosi ya yena; ni murhumuwa a hi nkulu eka la n'wi rhumeke.]

[Loko mi tiva timhaka teto, mi katekile loko mi ti endla.]

[I ngaku Hosi yi nga katekisa ku hlayiwa ka Rito ra Yona.]

[Hinkwavo lava nga ta va na xiave, vavanuna va ta hlambisana milenge eka kamara ley, lahawani; kutani vamanana va ta hlambisana milenge eka kamara ley nga eximatsini, lahawani, eka kamara leyintsongo yo khuvulela kona. I ku tsaka lokukulu ku vona vunyingi lebyi nga swi tsakelaka, na ku swi kota, ku ta byi ta va na hina eku hlambisaneni loku ka milenge.]

[Xana hi nga yima swin'we? Hikokwalaho ka lava va faneleke ku famba...]

[Nakambe hi ri hi khensa ngopfu na ku khensisa emahlweni ka Xikwembu hikokwalaho ka siku leri ra kahle, leri nga va nhlohloteloo wonghasi etimbilwini ta hina, eku voneni ka Vukona lebyikulu na ku va kahle ka Xikwembu xa hina ku va xi ta exikarhi ka hina ku va kona ku hi hlohloteloo na ku hi katekisa.]

[Loko ha ha korhamisa tinhloko ta hina kun'we, hi ta kombela Makwerhu Earl Martin loko a nga ntshuxa lava va faneleke ku famba.]



KU HAGANEKA TSO63-0901E
(Desperations)

Hungu leri hi Makwerhu William Marrion Branham, ri sungurile ri hangalasiwa hi Xinghezi hi Sonto ni madyambu, Ndzhati 1, 1963, eTabernakeleni ya Branham eJeffersonville, Indiana, U.S.A., ri tekiwile kusuka eka nkandziyiso wa thepi ya maginetiki kutani yi tsariwa yi nga khomananga hi Xinghezi. Hundzuluxo lowu wa Xitsonga wu tsariwile wu hangalasiwa hi Voice Of God Recordings.

XITSONGA

©2019 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE
58 DISA ROAD, ADMIRAL'S PARK, GORDON'S BAY 7140 WESTERN CAPE
REPUBLIC OF SOUTH AFRICA

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Xitiviso Xa Mpumelelo Wo Kopa

Timfanelo hinkwato ti hlayisiwile. Buku leyi yi nga ha kandziyisiwa hi printara yale kaya leswaku munhu a ti tirhisela kumbe ku yi phakela, yi nga hakerisiwi, tani hi xitirhi xo hangalasa Evhangeli ya Yesu Kreste. Buku leyi a yi xavisiwi, yi humesiwa hi xikalo lexikulu, yi vekeriwa eka “website,” yi hlayisiwa eka tisisiteme leti ti nga swi kotaka kuva yi tekiwa, yi hundzuluxeriwa eka tindzimi tin’wana, kumbe yi tirhiseriwela eka nkwama lowu wu nga pfumeleriwa handle ka nhlamuselo leyi yi nga tsariwa ya ku pfumeleriwa hi Voice Of God Recordings®.

Vuxokoxoko byo tala kumbe nhundzu yin’wana leyi yi nga kona, mi komberiwa ku ti hlanganisa na:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org